

國朝文匯丙集目錄

卷二十九

楊季鸞 字紫卿湖南甯遠人國子監成豐元年舉本廉方正有春生樹詩集

使黔草序

趙廷愷 字存之江西安陸縣人成豐二年進士官至刑部郎中有十三旬閣文彙

復夏幹園先生宛沂曹濟賑災書

汪曰楨 字仲維號謝城浙江烏程人成豐二年舉人

南潯鎮志序

九友堂記

丁賢楨 字楫瑞貴州平遠人成豐三年進士官至四川總督文誠

遺摺

裁撤夫馬局疏

吳大廷 字桐雲湖南沅陵人成豐五年舉人官至臨建臺澎兵備道有小西使山館文鈔

贈易笏山序

嚴咸 字秋農湖南辰州人成豐七年舉人

國朝文匯

卷二十九

目錄

上曾相國書

十

瞿元鈞字伯陶號石雲湖南人善化人咸豐七年舉人

水月林記

十三

朱次琦字未詳廣東南海人居九江鄉學者稱為九江先生由進士官縣令著有論史口說已刊大雅堂詩集五卷未刊

澹泊齋記

十四

南海九江朱氏家譜序

十四

去襄陵後答王萊友書

十五

歐陽敷字功甫湖南湘潭人咸豐朝諸生有秋聲館遺稿

與羅秋浦丈論詩書

十七

與劉幼蟠太守論團練書

十七

祭外舅馬悔初先生文

十八

祭羅幼崧文

十九

陳起書字通甫一字松心湖南郴州人起詩弟州有武豐即周同縣有越山草堂遺稿

南言一

二十

南言二

二十

南言三

二十一

南言九

二十一

桃核集殘彙序

二十二

彭菊村墓誌銘

二十二

公祭陳肅堂文

二十三

昭德侯祠記

二十三

楊源漢字桐江湖南新化人咸豐朝諸生著有就正齋古文

刪微論

二十五

漢文帝佐百姓論

二十五

唐太宗放宮女論

二十六

郭子儀論

二十六

唐肅宗即位靈武論

二十七

國朝文匯兩集卷二十九

使黔草序

楊李鸞

甲辰九月。余秋闈報罷。將回永州。鄧湘皋丈走謂予曰。鼎州山水清曠。君所舊游。予適講授明江。不可不窮其勝。且鼎為滇黔門戶。往來之所必經。今歲何子貞編修典黔試度。此時必歸。歸必訪余。而君與子貞投分甚至。曷往游。山水友朋之樂。將於是乎。在。余固繫念子貞。聞言念愈切。其時旋永舟已具。遂改南而北。挂帆數日。至鼎州。至則書院諸生相與扶掖行李。埽東齋為下榻。湘丈蓋後至。未幾而鄧叔績來。流連數日。然遲子貞久不至。叔績有事他往。余亦興盡思歸。湘丈謂余此間某山某寺。不可不游。即日趨命駕。蓋欲遲余行。俄而慶太守遣人詣院報子貞至。湘丈大喜。既而子貞來。話舊後。出示使黔草。且屬題記。余與湘丈皆有詩。會黃海華司馬移樽至院。楊性農胡蓀石竝在座。與子貞同出使。為萬籟船學士。學士忘分遠交。譚燕竟曰。山水友朋之樂。其信然歟。使黔草別無副本。余與湘丈讀未竟。恩恩遂別。後聞有刻本。子貞曾郵以見寄。為他人所得。秘不與。今始得而卒讀之。余觀其報稱之心。一皇華之咨諏也。得人之盛。一旱麓之榛楛也。陟屺興嗟。脊令致歎。於懷母憶弟之篇。見之友朋。燕會酬唱。往來見伐木魚麗之情。馬思深哉。其有三百篇之遺意乎。夫詩以道

性情無性情即無詩不待言也。事父事君與觀羣怨一寓之於詩非學而能然乎。故惟專於詩始可與言詩。抑惟不獨專於詩乃可與言詩也。專於詩斯有得於詩之內矣。不獨專於詩斯有餘於詩之外矣。要皆性情為之也。學問為之也。是則子貞之詩一子貞之性情學問而已。真氣充溢而精華外著。有不知其然而然者。必一一舉似古人尋條而失幹。豈知子貞者哉。願自與子貞朗江一別後。凡七載。今春旋里。始相晤於永州。余適主講濂溪書院。為余留十日。徧覽泉陵諸勝。繼相晤於道州。余又為子貞留數日。晨夕坐東洲草堂。望九疑山色於烟嵐杳靄中。後相晤於潭州。為最久。子貞寓李眉待石園。園內竹木蕭森。奇石羣立。而余寓竹林精舍。亦儼然有塵外致。往還過從。殆無虛日。山水友朋之樂。蓋未有如此會者。而重陽後。邵中來信。湘水竟不起。子貞復將北行。因今日之會。溯曩日之游。低徊鼎水。如在目前。存亡離合。人事變遷。又不禁感慨係之矣。余取子貞詩。加以墨圍。歸示書院諸生。中有見懷之作。依韻奉和。因序吾兩人蹤蹟如此。至於性情學問。充擴無窮。又烏可不共勉哉。咸豐辛亥十月朔。

復夏幹園先生充沂曹濟賑災書

趙廷愷

河決豐北。江南地也。而害先及於山東。豐之北界滕。充地也。豐沿隄而西。界單曹地也。黃水入微山湖。經郟城而東。趨郟。郟為沂地。微湖之水漲溢。運河金鄉魚臺嘉祥皆被患。魚臺尤為澤國。此濟甯州地。故山東籌賑屬充沂曹濟。某七月中旬。奉河帥委由曹單廳各堡親視豐境。已察其隄上書言之。然非東河所轄。何能越畔。未數日而告災矣。在曹單工次。目覩老幼男女或空身扶杖。或肩荷絮屨。累累向隄上行。由隄而散於各村各邑。不知凡幾。霜清時由工旋金嘉兩邑。隔水難通。遂繞沂澤鉅野嘉祥。沿途見難民不少。至濟即乞回籍。領咨應春官試。茲北上復次舊館。身非局中。而先生情篤梓里。愛猶舊屬。因出各縣所議賑災及方伯刊刻章程見示。欲參酌一詞。先生奉命分巡斯土。原有專責。某何敢謬為借箸而籌。夫魚臺之議曰。學賑初甚不解。想不過學中人欲自厚其身家。危詞以聳聽聞。試問士與民貴賤異。性命同乎。而援在學者。朝廷尙加恩恤。貧士給廩餼。是賑必倍於平民。獨不思平民之疾苦甚於學中人。歟。抑不甚於學中人。歟。既以賑論。則止論受災之輕重可耳。若遂其所請而益之。必至開紳賑者。賑胥。賑吏。賑之門。而官又當何如此。可先仰學申飭。毋庸賑訟。曹之議曰。客賑蓋以逃災而來。散住於城市村莊者。悉係客民。意欲聚而

賑之。不使本地無賴藉名攘奪而難民且不至在鄉騷擾。議亦近是。然自古有散賑而無聚賑。苟聚賑之議一行。而四境聞風。蝟集將其勢。有不能徧給。而求生轉以求死。萬一不給。能保其眾之散而不為他慮也乎。昔吾省辛卯九月水。大府愛民為心。設廠沙井。派員施粥。散米。至冬月。而湖北安徽難民擁就。眾至三十餘萬。當局者無可如何。聽其渡章江門。則店商居民不勝其苦。幾至罷市。禁其渡。則餓殍枕藉溝壑。大府朝夕抱城隍而哭。後從某說。各給錢一千文。令其回籍。然而死者已過半矣。想曾聞此。不可不鑒。惟滕之議。任紳士編戶口。與運河隄工。以力易食。而少壯者可給。勸富戶平糶。以錢易粟。而饑餓者易飽。此法誠為近古。而方伯以為不遵頒刻章程。嚴札痛斥。先生亦嘆息。而婉諭其勿忤憲意。今方伯之所頒刻者。何程乎。區區造水桶之式。置甕缸之式。備柴之式。作竈之式。繪數人挑粥沿村沿路。一盂一瓢。提而食之。其引證云。昔見京都及金陵行此法。極善。不知京五城分設粥廠。自十月至明年春。以賑窮民之無所依者。不勞跋涉。不慮偏枯。不事稽查。此常賑。非巨災也。金陵木料廣。缸甕亦多。好善之家。往往冬間雇數十夫。夫煮粥。各挑一擔。遇窮人。輒以食。都里巷曲中。廢疾受之。有恥者。不辱。此私惠。非公濟也。豈大臣為政。而乃以一肩之粥。救萬民之災。無論一肩之粥。不能徧。即令數十人而肩之。又須數十萬人之費。其一

肩能行幾里。幾里又設一缸。幾缸又設一竈。幾竈當備若干柴。且南北之嗜好不同也。徒曰粥。將以米麥為粥乎。抑以麥粟為粥乎。南北之物產不同也。徒曰桶缸。將以木瓦為桶缸乎。抑以荆柳為桶缸乎。吾知製器於北。取材於南。必有數倍其勞。而後能涓滴入口者。嗷嗷欲絕。何堪待此。況半賑粥之法。利少弊多。古已言之矣。擇曠地分男女。厥置大小缸。每缸給米若干。先期命胥吏煮之。覆以笠。圍以草。次早給發。法亦簡便。無如缸大者可容一石。而奸胥報以一石幾斗。缸小者可容數斗。而奸胥報以一石。人集則用更浮。開米扣則數請增給。覈嚴則添水攪和。官既依數發糧。豈能坐視其炊。而親為量算哉。抑豈能徧查一一記注哉。第任其朋比侵蝕。以充慾壑。此弊一。大缸煮粥。米厚水平。驟難調熟。而天明始散。又不能生熟各半。所以灑石灰揉惡屑。其積習如是。夫民以饑餒臟腑枯槁。憔悴陽氣內耗。奔走風塵。陰氣外逼。而經徹夜凍肉成冰。啟甕挹注。雖溫亦寒。在稍有天良者。或撓以熱漿。或煨以束薪。奈石灰揉化。其間饑民早中其毒。是以偏災設粥之處。每屆春夏。恒有病瘟疫泄痢患癰疽嘔逆。浸尋及死者。蓋石灰之性。與積寒之氣。陽動陰溼。證多不治。此弊又一。粥廠一開。萬民雲集。或襁負其子而至。或扶持其老而來。奔塵四起。啼聲四起。少壯爭趨於前。衰稚瞠乎其後。強則挹其熱。而幸已果腹。弱則吸其冷。而聊以充腸。或後至

而俛嗟空勞。或顛躓而莫保。身軀愈餓。則回途愈難。愈冷則欲行愈僵。且窮民弱婦。疲癯殘疾。忍饑餓而羞言出戶。悲燒獨而終日閉門。一息微存。既難與千萬人爭一杯之粥。寸腸欲斷。不幾延三五日而委一命之終乎。豈不痛哉。豈不痛哉。是又一弊矣。雖然。天災流行。國家代有。天事固弗能弭。其憾而人事又未能備於先。今欲臨時補救。殆亦仁心仁術之一端。第賑災政。鮮善策。擇其較善於彼而盡吾心之仁之術。俾行之不盡虛名。受之稍沾實惠。則莫如放糧一策。為長。放錢次之。而說者謂放錢恐生弊。竊販例。大口給銀一錢五分。小口減半。折以錢亦如之。而里書鄉保所報戶口。類不實。家八九口者。或減報四五家。六七口。或增報八九大口。或降為小口。小口或升為大口。於是胥吏串同高下。暗中分肥。里書復索報名造冊寫票。各項費用。每口實領無幾。放錢原有弊。放糧何嘗不可勒索。何嘗不可剋扣乎。要必遵委廉正之員。延請公正之紳。於本地之相識同氣者。亦能代詢代查。有無遺漏。有無浮濫。於是定期按戶給票。放至某時為止。其堆儲之處。於滕則舟車通衢。凡近滕各邑者。先團於滕。然後轉運各邑。則固於濟以轉運之。沂鉅嶧鄒各邑。秋成尚足。糧食亦有來路。其饑民多係從鄰境遷徙而來。此可以錢照米價給之。法與敬米同。而便官亦可便民。至於辦運徙流移之客民。則與辦被災之戶口。又稍異。先派官紳於各市各集。查

照實係遠來饑民。本地無賴。不准濫入。預懸諭以某日止。後到者冊內不准補造。勢難溥博。傳諭願回籍者。轉徙者。量其路程。計日給以口糧之錢。即於冊內注銷名氏。多則共給印票。止准數十人一張。以省沿途滋擾。即沿途亦可照票按名給發。富有之家。豆區釜鍤。容有周恤。餘法皆與滕濟散米限期同。如此則曹之言賑者。得所位置。而與某明府所議。不相抵牾矣。然則魚臺曰學賑。詎無兼全之道哉。大抵以學賑為名者。羞效托鉢吹簫。鄙態也。賑之一律。與庶民同。有實心實意相助為理。則例賑之外。按日另給薪水若干。從其踴躍從公之志。無學賑之名。而有學賑之實。又與某明府之議。非拘鑿焉。隸籍於鄉者。難民災戶也。一一安全之。往來於城者。殘疾乞丐也。在在哀矜之。庶幾粥廠之設。可以行矣。飭令鋪戶街長。環城徧稽。造冊若干人。遵方伯刊刻章程。取其按日之條。示以起止之期。此等人數。非敢憚其居處無定。器皿不具。熟而舖之。無不歡騰。其地則一廟宇一祠屋。可以立壘。其人則數夫工數侍從。可以點查。不勞不費。又與方伯之旨相發明。安有遽于進責者歟。若夫滕議興築運河。以工代賑。此范文正之縱民競渡。大興土木意也。序屋隆冬。民間且情。閭則惡念。易萌。而宵小之蹤。起情。則寒氣易侵。而痺痿之病。伏。但凡有橋梁傾壞者。水淤塞者。田園汙萊者。城郭頽圯者。皆可乘時鳩眾。分以工段。定以工價。修葺之。排濬之。壅閘

之培植之。而小民筋力素勞。挾其畚揭鋤鑿。亦易從事。得其所領之價。藉可養其身家。獨不可經胥吏手。致小民胼手胝足之勞。而飽侵蝕蠹之業。不但此也。夫以官養民。其養有限。以民養民。其養無窮。方今田地多屬富家。大戶之產。值此水落之際。勸其修隴築隄。不必緩俟。來春則災民亦得有所託業。豈非以民養民。不庸愈於勸民捐粟乎。然而賑與捐。兩相須。各郡殷實頗多。濟州尤巨。國帑一發。動輒百十萬。其勢亦難源源接應。富民目擊災難。何忍不一分其憂。與其坐擁厚貲。釀生劫奪名實俱喪。何如慷慨散財。保安無事。在殷實中。大小不齊。興衰無定。尤宜平允開導。諄切曉諭。使其自然樂效。毋稍抑勒。庶不至專恃富民以養貧民。若富民亦貧。恐貧民益無所賴。保富之法。不可不講。此賑法之推而行之者也。他如陳積貯之說。講平糶之方。賢太守良有司。諸議無不引經援史。堪資採輯。竊以為此宜預辦於事先。未易遽施於當境。今宜亟拯於目前。且當遠慮於事後。黃水湖水。匯而泛溢。田土漂沒。無算來年。即豐稔。果能償常年積糶之數乎。難民四逸。廬舍器具無存。來歲即歸里。其能復往歲康樂之象乎。制治於未亂。防禍於不虞。固知積貯宜備。即保甲尤必行。向由保甲之不明。所以造冊注名。一時繁蹟。今既戶口查實。經理有方。遂因被災而暨。未被災之處。行賑法。實行保甲法。如一縣有幾鄉。一鄉有幾許村。一村有幾許民。設立

里長鄉公正掌記。隨地置甲。隨時稽考。按月一報。按季又一報。則鄉之大小。民之多寡。無所蒙隱。將一律整齊。外方冠盜無從入。境內奸邪無所容。縱有歉收。亦易調劑。儻有他患。守望相助。洵不戢而自消矣。且夫沛澤者上也。蒙澤者下也。致天地於承平。永保長治久安之庥。必在上之得人。而與上下相孚。堅僻自恃不可。阿諛逢迎尤不可。豈獨議賑一節也哉。愷管蠡罔窺高深。欲圖改絃易轍。承不以為卑鄙。草繕具對。為先生鑒錄。斯究沂曹濟幸甚。山東幸甚。即江南亦幸甚。

南潯鎮志序

汪曰楨

咸豐甲寅南潯始設絲捐局。抽釐以佐軍餉。鎮人金坦齋載錫。朱硯泉養誠。蔣海珊堂。邵雨帆。湘邵介人。藩張魯卿亦賢。實董其事。每年充餉之餘。留其百分之五。為本地善舉公用。於是丙辰秋有修鎮志之議。屬余編纂。三年而後成。既成付刊。始於己未之夏。至庚申春。刊未及半。適粵匪陷廣德郡城。戒嚴而潯地晏然。剗剗之功。未嘗暫輟也。四月中。垂成矣。而蘇常亦陷。六月賊遂入潯。潯人倉皇遷避。因取已刊之板。移置湖濱之葉港。至冬而賊逼湖濱。復移板至上海。辛酉夏。上海又警。復移至崇明之陳家鎮。皆海珊之弟厚軒維基。以一人任其責。暇日檢點板片。稍有殘缺。但原稿已失。意謂終於殘缺矣。既而晤魯卿。出其所藏底本。則缺處宛然具存。不覺為之愉悅。乃次第修補。并補刊地圖及補遺諸條。鎮人避亂徙寓上海者數十家。皆欣然醵資。以備刷印。蓋至是而修志之事。始迄於成矣。回首鄉園。久為賊窟。廬舍焚蕩。百無一存。戚友離散。死生莫知。凡志之所錄。盡成夢境。徒供後人想望之資。欲求旋定安集。復還舊觀。未知何日。獨此志缺而復完。仍為全帙。蓋非厚軒則板必不存。非魯卿則板雖存而必不完。非諸君醵資刷印。則度置高閣。板雖完與不完等。然則此志之得以流傳。而不至湮滅者。雖曰天幸。豈非人力哉。故記其顛末。綴諸末簡。以告後之

人若夫鄉人士女能奮身殺賊及遇賊不屈而死者不乏其人俟異日戡定歸於鄉里當詳為採訪編附志後此時則未暇及也

九友堂記

昔在明中葉烏青有九老會或貽以詩云尋常尊酒頻酬勸適意林泉任往還。可想見其高致。余嘗與朋輩語及之。謂古今人豈不相及也。久之未有所合。則姑置之。壬申冬。自會稽假歸。溱上舊雨沓來。復理前說。適仁懷堂東偏有隙地數十弓。同人遂釀金購得之。將築室以為社會地。前臨方池。饒菱藕。幽芳雅潔可愛。兩岸植柳。則多綠陰。花晨月夕。呼朋觴詠其間。不足寄清興乎。時亦得九人。因顏之曰九友堂。夫同門為朋。同志則曰友。九者陽數也。易以陽為君子。故有取乎九。且於祝嘏宜不必遠援香山也。援烏青焉可已。抑昔溱之人嘗祀鄉先輩於妙境庵。遭亂以來。此典闕而未舉。斯堂也。成。曷即於斯。薦蘋藻乎。僉曰可。則請將來以所築歸之。公明我九人無私可乎。僉曰可。約既成。白水鑿之。乃援筆而為之記。九友者。為劉貫經。鏞。張竹齋。頌賢。金竹庭。桐。龐芒。皋。雲。鏗。邱。樸。亭。炳。咸。周。芸。齋。昌。富。顧。容。齋。壽。松。蔣。密。樓。維。城。與。余。而九。是歲仲冬。謝城汪曰楨記。

遺摺

丁寶楨

奏為微臣病勢陡增危在旦夕伏枕哀鳴叩謝天恩仰祈聖鑒事竊臣自去冬因病兩請開缺荷蒙溫旨慰留自願受恩深重不敢再瀆謹於三月初四日力疾銷假具奏在案起假以後連日督同司道籌畫京協各餉整飭捕務鹽務會商護理將軍臣署提督臣將邊防營務藏衛各事宜擇要辦理用心過度氣血愈傷本月初十過堂定擬秋審忽感外邪牽動舊疾日增一日起至十七日晚肝風陡作更形危篤當將臣署日行公事委藩司代行代拆二十日省城文武均至臣榻看視尚可與言延至本日氣急痰喘食不下咽即刻將總督關防文卷等件交藩司分別存庫臣沐浴三朝養養之恩頻叨異數犬馬餘生尚願以身報國今遽鍾漏向盡區區微悃結草何年瞻望闕廷罔知所措臣在籍勸匪即誓效命沙場今行年六十有七獲保首領以歿尚復何憾惟念川省東連長江北通關陝地接滇黔民情浮動加以英法兩夷逼處雲南狡馬思逞英人俄人又均有入藏之議將來必肇兵端臣前所陳防邊一切尚未及時布置返之寸心徒呼負負太抵外洋和約萬不足恃海軍既已創辦即應實力操練腹內防軍不宜再議裁撤只可以安為攘不宜重外輕內抑臣更有請者皇上春秋鼎盛指日親政應請舉行日講以裕聖功帝道之隆

要以近賢人君子。遠宦官宮妾。為圖治之本。勿以財用不足而進言利之臣。勿以時局多艱而行苟且之政。固結民心。即所以深培國脈。此皆臣戀主之忱。所耿耿不能自己者也。至臣在川十年。深知利弊。所裁之夫馬局。不宜再開。所辦之官運局。不可遽改。機器製造。為西陲異日之軍需。積穀倉儲。備全川不時之荒歉。愚昧之見。伏維鑒察。臣病勢至此。萬無生理。伏枕哀鳴。望闕叩頭。口授臣幼子體晉恭代。清摺叩謝。天恩。伏乞皇太后皇上鑒鑒。謹奏。

裁撤夫馬局疏

川省自同治初年。本省鄰省軍務緊急。各處徵兵防勦。地方供給兵差。始創設夫馬局。由地方官委紳設局。按糧派錢。預備支應。其初專為防勦緊要。辦理兵差而設。原為萬不得已之舉。迨後軍務肅清。兵勇大半遣撤。而各廳州縣積習相沿。仍借支應兵差名目。任意苛派夫馬。盈千累萬。有較正供浮多。加至數倍。地方官以此為應酬入私之具。局紳以此為迎合漁利之階。小民脂膏。半入官紳私囊。二十餘年。視為固有。民力幾耗。豈堪長此剝削。雖前督臣吳棠查明分別裁撤酌減。而各屬仍多藉口。差使大都陽奉陰違。臣於光緒三年到川。民間具控夫馬之繁。層見迭出。民情嗟怨。困苦堪憐。當經通飭一律裁撤。惟查南路之雅安。邛州。上至省城。由省至北路廣元。

出境十八州縣為藏差喇嘛學差試差往來要道例有支應不能不稍為酌留以資津貼仍請由臣親為核定於向派錢數大加刪減以杜侵蝕而紓民力其餘各屬均自光緒三年六月起一律全撤不准再派民間分文如違嚴叅懲辦嗣據各廳州縣陸續稟報裁撤復經遴委賢員分赴各屬明查暗訪亦尚無巧立名目影射私收情事至今數年以來民力稍紓應供之差亦無貽誤現在各廳州縣均尚恪遵辦理第恐歷久弊生不肖官紳復萌故智仍藉詞添設夫馬局亦不可不預防合無仰懇天恩俯准飭部立案以垂久遠以後如有不肖州縣擅自開端私行攤派一經發覺除將該牧令嚴行叅辦外並請將違行批准及失察之總督藩司一并降級示懲俾川中士民長獲休息上副 聖主軫念民艱之至意

贈易笏山序

吳大廷

嗚呼。今世之慨然於人才難得者。我知之矣。其侈談經濟者。才氣自負。往往凌厲震蹕。視天下事無不可為。或時與機值。亦嘗赫赫著功勳。不幸而偶蹉跌。或適遇非常駭愕之事。則氣沮神傷。嗒然若喪。較之木訥無能者。而有甚焉。其高語性命者。無程朱明體達用之學。而唯知矩步規行。拘守小節。至闕物成務。凡君子小人進退消長之機。與夫治兵治眾一切張弛緩急輕重之宜。概焉莫之深省。試以事百鈍並見。而天下遂紛紛以道學為詬病矣。嗟乎。道德事功。是果為二事哉。道德事功之出於二。此天下事之所以不治。而人才之所由不可得也。且夫古之君子。內以自治其身心。而外以備天下國家之用。故方其處也。退然若不勝。及其得所藉手。或投之盤錯之地。或試之以金革。百萬安危。決於俄頃。生死介於須臾。而當之者。從容擘畫。恢恢乎有餘裕焉。無他。其素所講明者然也。後之人。分道德事功為兩途。故其學不能以相兼。而其弊每因以互見。惜乎。吾深有鑒於此。而力不足以副之也。吾友易笏山。遭時方棘心焉。憂之思。以一身矯其失。而於是毅然有請纓之志。笏山之學。與余同。交日益親。而其才氣則過余遠甚。故余於其行。怒焉以悲。又不能不肫然以望也。語曰。行百里者半九十。況並未至九十者乎。然則笏山亦交修焉。而唯日不足其可也。士之

自待也重。則其責之也愈殷。而其副之也為尤難。繼自今。子將無驛足之日矣。嗚呼。其可不勉也夫。

上曾相國書

嚴 威

前於長沙將赴澗水寄上尺書并先君行述求謀墓表以光泉壤想已遠遠道出章門因病小住欣聞閣下將士恢復江甯積年巨猾一旦摧破好音甫懷曲踊三百昔范老圖夏莫復橫山贊皇作相未定河朔閣下指縱羣英翦此鯨鯢未踰勾踐生聚之年遽成裝度淮蔡之功真曠世奇勛也兼之入蔡李愬相公介弟鎮蜀吳玠安撫難地忠義萃於一門尤古今所僅見李郭興唐耿鄧佐漢方之閣下何多讓焉竊念粵匪初起陸梁小醜耳將帥失律縱其豕奔遂成燎原之勢東南金湯相繼覆沒文物之邦胥成盜藪智者焦慮勇者控拳莫不謂滄海橫流談何容易閣下摧剛為柔轉敗為功建旆湘中屢躡屢奮拔奇傑於草澤擢名將於行間三數年間大勛竟集固智愚所不料即閣下始願亦未必及此也方今妖氛初斂神州新復民歌來蘇士詠破箬幕府詞人解譙河清之頌行軍司馬會成平蔡之碑金石煨糶千載一時昔羊祜言平吳之後尚勞聖慮范文於戰鄆之役願遺外懼大臣用心自古如斯閣下今日諒已從同則不才如歲將有一得之獻夫功成身退天道之常薦賢自代古人所尚閣下焦勞十年手足胼胝耿耿此心足報君國矧建大功無負天下若於此時投簪遂初薦杜預為替人尋洛中之故事朝廷大政動咨山中衡湘林泉常供

清觀遠勢辭榮息交絕游課耕教子以樂天年身名俱泰世莫與京矣然此為閣下
一身謀耳若為天下謀則不忍出此天之生材不偶賢如閣下近世有幾公歸不復
是朝廷少一可倚之人草野少一造命之人大江南北瘡痍未復誰與拊集兵勇
誰與安插官吏誰與黜陟惠棧招商興屯結堡蠲除疾苦翦滅豪強凡此庶政誰與
經營且豫章漏網尚肆跳梁關中游魂近窺英霍卧榻之下尚有軒聲丈夫雄心能
無奮發耿弇妙齡不以賊遺君父馬援暮年尚自躍馬遄征自古英雄類多如是咸
知閣下今日雖欲蹈謝傅之高節勢必不能且充國平羌克善厥後原傑定郾安插
得宜區區一隅料量何詳矧茲神州豈容疏忽所望開誠布公集思廣益勞謙終印
視民如傷蘇常租稅弊流公田降及有明徵收不減國家龍飛之初因循勝朝之
舊小民敲髓坐困十年豪衿包漕遂成積習真東南之巨蠹也若能形之奏牘予以
蕩滌省煩減重以蘇閭閻再擇有司破除文法勤加拊循時行什陌問民疾苦招撫
流亡隨宜安置量給牛種專事農桑暇習拳勇守望相助姦宄自弭一年之後加以
考績民人眾田野闢城郭修政事理治行為最庶事未修民心尚與者次之否則登
之白簡又大兵之後絕業必多功成之日游兵難制似宜興屯編集此輩文饒屯兵
川中得勁旅二十萬樹艾屯田淮上收野穀十萬鍾興屯之效彰彰如是責成有司

必收大功。若漫無安頓。此輩本非孝子順孫。一旦篝火狐鳴。有陳敏李特者流。倡亂其中。禍尚忍言。此江皖今日之急務也。自古言富強者。無不從事山海。淮揚魚鹽之藪。大利所在。可委幹員。詳議榷稅章程。遠遵管仲計算之法。近參劉晏變通之術。庶其有濟。又羊祜刈穀。酬以金帛。祖逖鎮豫。不廢互市。收利無算。裕國實多。方今島夷宜事羈縻。推其貨貝。充我軍資。幕府濟濟多才。凡此數事。洪纖巨細。早已策之裕如矣。抑咸竊有慮焉。湖州襟江帶湖。為江湖要害。狡賊死守。倉猝未能遽下。近聞江甯餘燼。頗竄入夥。此郡賊勢必至更張。比來杭城兵勇。分擊江西巨股。餘兵不多。難期旦夕奏效。閣下動計大局。全無畛域之分。若能迅派水師。截駐太湖。以次搜殄。港汊賊船。大軍四面雲集。因恟而攻。必能得手。湖州既克。江甯亦無後顧之憂矣。又皖南一區。為江皖浙三省通衢。實東南衝要。故桓彝以死守之。鄙意宜於此處屯設勁兵。如老羆之當道。隔絕賊勢。即湖州克復。江西肅清後。亦宜予巡道。以重權。做臺灣故事。令其屯田練兵。用人理財。以備非常。而南陽光信一帶。山林奇險。真皖大隄。直隸形勝。猶昔易於控禦。春秋吳楚構難。六朝南北相伐。往往爭之。此間巡道亦宜倣照皖南事權。既屬措施自易。自能靖內攘外。鞏固疆場。秦豫皖楚。有此鎖鑰。不虞捻匪之衝突矣。但必須龔遂張綱度。尚龐參之流。當此重寄。始能勝任耳。此又江皖今日

之急務也。至若天下之大計。數十百年根本之謀。則在寅天命。崇聖學。練禁旅。重邊陲。數事。自來聖帝賢王。莫不兢業自持。每當國家多事。卧薪嘗膽。固其常也。即海宇清晏。亦不敢稍自逸豫。每當祥瑞紛出之時。不敢以為祥。而曰余德何堪。即災異偶見。惟返躬自責。覆之以善。此宋景一言而熒惑為之退舍也。今江甯雖復。而海內尙未全安。如能上下憂勤。以答天庥。中興之業。不難致矣。天下能益人神智者。實惟典籍安人家國。首在學問。虞廷都吁。周家訓誥。傳美於無窮。下及漢肅魏文。妙齡踐阼。莫不孜孜墳典。臨雍養老。北面親執醬醢。問業請益。卒之方隅向化。天下乂安。我

聖祖仁皇帝八齡御極。專精問學。厥後學貫天人。臣下莫及。戡亂修政。比隆成康。為三代下第一明辟。皇上龍飛伊始。春秋鼎盛。於視朝之暇。尤宜專心經史。擇

端愨通儒。以為師保。貞亮英彥。以為左右。聖敬日躋。不難繩武。仁皇矣。皆

錯為太子家令。而漢景以嚴刻著。李泌為肅宗賓客。終能再興唐室。墨子所以悲染絲也。賈誼曰。左右罔非正人。則太子正矣。今日之事。正當效之。又漢宮后妃。師事班昭。晉代宮嬪。尙有左芬。女史彤管。深宮不可闕也。又曠容誦詩。易感人心。更生作傳。大關世教。竊以皇太后政事之暇。如資治通鑑。大學衍義。列女傳。本朝祖神宗實錄等書。亦宜時加披覽。或令曠容女史講誦。一過曉然。古今成敗。及

祖宗創業之艱。臨朝決事。行見德邁明德。功高宣仁。他如王公大臣。亦宜於政事之暇。按討經籍。詳擇師友。以充擴其識見。涵養其性情。應事接物。必能遠邁古賢矣。我朝禁旅。曉健素聞。入關以來。猶自龍驤。延及中葉。承平日久。因循不振。遂成今日之勢。目下戡定捻匪。全資蒙古驍騎。蒙古外甥之國。馴服日久。兼之單于臣僕。無異家人。固可常藉其助。但根本之地。終資同姓之親。使禁兵胥練。則益收內重之勢。絕無尾大之患矣。回紇之佐唐。何如周召之輔周。又前事之師也。竊以此時旗丁老弱。者可令自謀生理。不必拘以限制。挑選精壯。成丁胥。令練兵器。責成八旗都統。按期操練我皇上於春秋農暇。躬御戎輅。大閱師徒。以整情定功罪。既足以鼓勵士氣。又足以懾服四方。行之期年。可期得力。各省駐防。亦宜嚴責將領。勤加訓練。老弱者。準其出外謀生。則藉無廢丁矣。至於甯古塔黑龍江為我朝發祥之地。伊犁西藏等處為我朝新啟之疆。創業匪易。守成為難。宜簡忠亮重臣。鎮撫其地。相宜開墾。勤加訓練。長城以外。胥成星羅之勢。既可弭外來之覬覦。兼能備中原之緩急。不可不早謀也。此四者。實天下之大計。然不敢自以為是。敬質左右。以定是否。昔賈誼弱冠上書宣室。仲淹居喪言事政府。咸何人也。敢希古賢竊慕。義方贈箴之義。謹抒宋人獻曝之忱。儻以滄浪之歌。孔子有取。芻蕘之詢。聖人不廢。願加採擇。施行事。

尙乞賜教。俾知奮勉。不勝拳拳之忱。抑咸聞之。是我不當為之賊。教人以善。謂之忠。辱在雅愛。再陳狂懇。天下之事。固敗於小人。亦未嘗不敗於君子。固難於圖始。亦未嘗不難於圖成。故張趙齟齬。宋祚不競。角巢殄滅。國勢隨弱。當此之時。膺大任者。非具休休之懷。斷難光贊中興也。閣下謙抑素著。寵辱不驚。成此不世之勳。若其固有之事。今日者。厝天下於磐石。為國家闢大業。溥海內外。誰不深望於閣下。伏維遠追劉宏。近法韓琦。審慎於左右之際。閣下安而天下安矣。妄發不罪。乞鑒區區。秋燥千萬為國自愛。咸謹上。

水月林記

瞿元鈞

長沙東城有寺曰水月林。不知初建何時。雖以水月名。究未嘗有水也。寺凡三楹。左右皆鄰菜圃。地僻而遠於市。其湘陰李文恭公為諸生時。嘗讀書其中。暇則與二三知好唱酬談讌。以為樂。及督學粵東。觴楊文芝樵詩。猶有今宵炎嶠月。疑照定王臺之句。蓋寺旁即漢定王臺。清曠之景。間適之趣。恒惓惓不能忘也。道光丁未。寺主將售之。他姓廢為民居。時梅生編修方營第宅。闢地為芋園。以其為文恭公讀書處。出背購之。繚以重垣。別通一徑。山門佛堂。悉仍其舊。於是斯寺乃與園之池水相屬焉。越十四年。仲雲觀察復修芋園。竝施丹堊於寺。徑前增以迴廊。欄楯蜿蜒。因曲勢作小亭。取蘇子語意。以知水月名之。寺復築屋三間。刻文恭公遺像於壁。一日招予游。暖茗亭上。而相謂曰。吾前夕來此。獨坐時。值好月初上。清光透林隙。射水中。明滅不定。游魚潛躍。宿鳥驚呼。涼風翕習。入襟袂。此心欣欣。若有所得。已而星稀雲斂。皓魄當中。水色空明。淨泓澗瀦。數聲鶴唳。與寺中鐘磬相和。令人有高世遠舉之思。自以為古之輞川平泉。恐不是過也。既念先君子讀書時。無此勝景。即後乞養暫歸。奉先大母。以游以息。亦林泉粗具。不逮今日。則又悲從中來。俯仰愴恨。而不能自己。且先君子馳驅王事。黽勉匪懈。垂二十年。卒以督師盡瘁。邁疾以終。於古人先憂後樂之

意。洵無所媿。方今四方多事。時艱孔亟。聖天子憂勤於上。諸疆吏與將帥鞅掌劬勞於下。而余獨席先人業。從容暇豫。徜徉於茲。得不內顧。皇然大懼。負荷之不克勝乎。余既寓書叔弟。為述此意。即欲使後之子弟。知芋園之所以有水月林。共思奮勵。有為。志先人之志。則是役也。庶非徒以供游曠而便居息也歟。余深韙其言。因不揣庸陋。而為之記。時咸豐十年六月既望。

澹泊齋記

朱次琦

果堂衙齋。顏以澹泊二字。蓋取諸葛武侯誡子書澹泊明志之語。或曰。志儉也。或曰。漢人喜黃老。武侯之云。殆亦無為無欲之旨。是故取之也。次琦曰。非也。嗜欲之熏心。如水之浸。撫萌動。圻溢致無窮矣。不自抑制。則起居服食聲色玩好之緣。雜然而至。於是黃緣機巧。果其貪營而肆其求取。其在內也。干國之紀。而恣睢。其在外也。形民之力。而醉飽。罪可至於滔天。故自來名臣德行建豎。不必一途。要無不本於澹泊者。謝大傅功高百辟。心在一邱。范希文斷齋畫粥。先憂後樂。王伯安日與門生對食。孫高陽飯麤糲。忍饑勞。至於我朝。圖文襄之吸豆腐。劉一孟。湯文正之苣江南。未嘗食雞臠。張文貞之白果數枚。山藥三數片。高文良之紙帳蘆簾。卻掃一室。終日若無人。皆此志也。吾聞果堂秩滿朝京師。公子友有饋食者。值錢萬。君不悻曰。饋食費萬錢。禮食當何如。觀若材地。故出彼人上。平昔相餉饋。亦有踰此者乎。我家餉饋若此。進而郎署。而卿馭。而宰執宗藩。何以行禮乎。公子懼然領訓退。兄子某。官某部堂主事。衣弋絺謁君。袂袵且傲矣。君詰之曰。若居要地。接要人。顧被服如此。安之乎。將以為名也。兄子跪謝曰。非敢然也。兒且趨公。無暇晷。偶忘焉耳。君則大喜曰。是吾志也。賚袍褂一襲。嗚呼。觀君之庭誥。可以知君矣。抑昔人有言。聞人譽之以卿相。則喜。必

非喜其鞠躬盡瘁可知也。嗚呼！果堂其同此耶。

南海九江朱氏家譜序

譜牒之學。史學也。周官。奠繫世。辨昭穆。掌於小史。史記。紀五帝。迄夏殷。周秦。並詳其子孫氏姓。而世本一書。漢志。隸春秋家。蓋先王譜學之記。實與宗法相維。而表裏乎國史。宗法立。而士大夫家收族合食。至於百世不遷。而奠其繫世。辨其昭穆。朝廷且為之庀官司。藏冊府。是故黃農虞夏之胄。閱數千祀。而可知也。世祿廢。宗法亡。譜學乃曠絕。不可考。漢興。天子奮於草莽。將相出於屠牧。率罔知本系所由來。魏晉至唐。仕宦重門閥。百家之譜。上於吏部。維時官之選舉。必稽簿狀。家之昏姻。必詳門第。而譜學復興。歐陽氏修唐書。有宰相世系之表。隱示國史家牒。相為表裏。且謂世族之盛。諸臣克修家法。致然。跡其編纂論述。若祖前史所無。然通人碩儒。咸許其湛深古誼。能探先王制作精意。蓋勦而實因也。五季喪亂。國牒盡湮。一二儒生。乃欲掇拾補苴。冀存古宗法一綫。及夸者為之。扳附華腴。虛張勳伐。或至不可究詰。譜錄一家。遂為識者厭薄。而去史益遠矣。吾族之有譜也。自明萬曆丁丑。文學公學樹始也。文學溯始祖。勵七世。當是時也。子姓服屬未遠。恩義綿結。風氣醇樸。其仕者精白一心。以從王事。而不有其家。其父老。教讓教謙。敦長者之行。其子弟。以讀以耕。鮮誇誕之失。

一二宦裔貴游。徙宅省垣。號稱豪宅。然日散千金。親故多待以舉火。一時數指紳家法。以吾族為優。微特家乘之先立也。厥後一修於處士公昌瑤。在國朝康熙丙申。康熙以來。無踵事者。道光丁未。次琦歸自京師。之官山右。父老祖予酒。談次及之。異聲同歎。咸豐初元。亟加討論。以寇亂中輟。已。次琦亦假還。共申前議。於是宗人朝議大夫奎元兄弟。慨然願任脯糈剗之費。乃會推吾弟明經宗琦主稿。而宗人上舍士仁士報景熙任之。次琦不揣樛昧。斟酌今古。成序例一篇。投以從事。是役也。冥局於已未之春。斷限於辛酉之臘。以今年正月。鐫竣刊易再三。編摩况瘁。歷十一寒暑。而書成。實費白金二千三百兩有奇。夫然後十有二卷之書。繫世之源流。昭穆之近遠。恩榮之覃被。祠廟之宗裡。墳瘞之阡原。執文之津逮。嫩惡之登削。遺軼之甄尋。直而不汗。信而有徵。不侈前人。勿廢後觀。敢云美備。要其規模。亦畧具矣。次琦行四方久。竊慨風俗日益以儉。而親情日益衰。不啻漢史所稱斗粟尺布而骨肉不相容者。朝議兄弟。獨能推鉅貲。不色吝。近又增實祠嘗。捐白金三千兩。而宗人翰林待詔銜國恩。亦捐千兩。洵乎義重千鈞。利輕一羽者與。於以見先人之遺澤長也。詩不云乎。戚戚兄弟。莫遠具邁。又曰。豈無他人。不如我同姓。自茲以往。願我族眾。咸喻於古者宗譜相維遺意。而使內外有別。長幼親疏有序。有無相調。吉凶患難相恤。腰膾祭饗飲食。

相周旋。毋以財失義。毋以忿廢親。則吾家世德作來。安見不如浦江鄭氏。江洲陳氏。諸義門。書之國史。以為美談者。宰相世系表序曰。門祚之盛衰。雖視功德厚薄。亦在其子孫。烏虜。可不勗哉。可不勗哉。

去襄陵後答王萊友書

萊友先生閣下。歲月易得。違侍遂已一年。予予行路間。以兵荒賤達遂希。同此邦域。輒已如是。其時東海南海。津涉萬里。其為契闊。何可勝道。比奉五月十六日惠書。勞問甚厚。益用惶媿。又省知動靜多豫。且浩然決引身之舉。甚慰甚慰。昔人所謂其出也若雲。其處也介於石。恢恢乎自我。訖信與道圓方者也。瞻佩無任。僕去夏反自襄陵。即以不才自棄。申請往復。歲盡乃復給咨。而江楚兩路。均已不可行矣。中間曾肅手書。具述歸里後當仿溫公故事。借為閣下誤傳。以貽學者。並陳屬草。雌槐。嬰賦。僕遊寡韻。尚須潤飾。今承督促。則知此簡未遂。籤幘不審。何處洪喬。竟爾沈置。奈何。平陽陷沒。公私塗炭。其為酷毒。如何可言。方春銜覲。風日正繁。冠纓之徒。魚鱗雜集。太守留兒送客。接牯舉觴。竹肉紛流。譚諧間作。白日既度。繼以脂燭。當斯之時。都市如故也。士女如故也。春容愉夷。昌丰潤澤。何圖數日之間。陵谷遷貿。府主寅僚。溘焉頓盡。甚可痛哉。以此忽忽。恍若有亡。加以宿食東西。車不絕軌。鞭轡稍休。願欲修理。

故業而愛從中來。停簡輟毫。感舊傷懷。漉漉誠不復能措意文字間矣。近雖棲
尋舊宇。譬如池魚籠鳥。時有山藪江湖之思。設秋後內地仍不可通。決意道津門航
海歸矣。幼安危坐。舉父掉歌。古之人有行之者。大人聞此。必謂生好勇。過矣。過矣。
之邪。悲之邪。大著釋例補正。益復精博無餘憾。說文句讀刻成。幸更覓便惠致。世難
方殷。靡知所底。項頌之嘆。詩雅以嗟。然竊惟自古泯芬之會。元黃文馬之秋。天命民
彝。必不可以一朝絕。不絕則宜有所寄。寄斯鉅者。宜在修學好古之儒。秦氏以選如
伏勝。申公。許鄭。二劉。熊安生之倫。是也。閣下勉旃。自愛而已。頃何以為娛。頗復有所
造述不。僕既不作河東之行。無緣復詣大治。悠悠之別。道阻且長。知復何時更得一
面。能重奉舉。比開吾觴。璠不。南望於邑。辭不叙心。六月廿有八日。琦再拜。

與羅秋浦丈論詩書

歐陽勳

讀寄示梅花百詠格奇而正意悲而和體會微而不纖運用多而不滯佩服佩服漁洋一代詩人然古體獺祭似義山無雄才真氣以運之惟絕句允推正宗憶昔年陳懿叔先生論詩及漁洋謂其筆下所出不及心中所知所選古詩盡古今詩人之妙他選家莫及也來教謂於漁洋止隔一塵者漁洋豈足以盡先生之詩乎又先生不棄拙作教以路陌所辨生熟真為至論動何敢言詩哉不過朋友往來之酬和平日讀書之感發偶傾寫以適己意而已今之以詩文辭名天下者江南梅伯言郎中也其論學詩之法初從荆公山谷入則庸熟繁蕪無從擾其筆端俟其才氣充沛法律精熟然後上薄諸大家而融洽變化以自成其面目此中先後等級不可凌躐動自服膺此論不敢如從前之率爾操觚矣然由是構思愈覺其遲鈍窘蹙正如先生所云趨生避熟者徐而養之循漸而為之以趨於寬博馳騁之域此勳之志也乾隆末袁蔣趙諸公才力甚富不屑鍊以就法故其詩多淺直俚諱之病不能及古而見喜於流俗獨姬傳姚氏確守矩矱由摹擬以成真詩為七子所未有千載之名當在此而不在彼也愚妄之見謬以上陳先生以為何如

與劉幼蟠太守論團練書

勅白太守執事。自月之朔。印衰門罹禍。狼狽棄徙。違教多矣。天下事吉少而凶。悔吝多。好動者輒遇之。某君是也。其詳諒已知之。聞執事處此舉重若輕。靜鎮之功。佩服佩服。鄙人於此竊有論焉。此次風鶴之警。賊未蹂躪至鄉。而無賴之徒。遽起蝟聚。殺越劫奪。所在皆有。此皆平日之良民也。為惡之機。變於俄頃。其喪心病狂至此。夫果何恃而不恐哉。毋亦由州縣官長。平日無實心善政。固結民心。而多事之秋。又不諄曉鄉里。徧行團練。以為外禦賊匪。內消土匪之大計。致吾民猝然乘亂。譁張為幻。陷於奇凶極惡。而不覺。雖事後不得不據刑亂國用重典之說。以懲之而已。末救矣。然此州縣不盡任過也。而過尤有所歸。何則。今之州縣。古侯國也。官必久於其職。而後無曠於其事。今雖不能如古之世守。亦宜限以終任。人地相宜者。則保舉奏留。職事有累者。即除免開缺。無所容其倖得。亦無所容其詭避。如此則州縣得以周知民情。興利除害。教化何患不行。風俗何患不美。一旦有變。止亂之法。裕如定亂之才。綽如也。今也不然。黜陟予奪。藩伯董之。而總其成於督撫。任意領之。以耳為目。罔攸稽覈。即如吾邑。六七年來。缺猶屬李君。而權之者已經四五矣。久者或一年。少或數月。事務繁雜。供給絡繹。彼方斤斤拘守其故事。緣飾其虛文而已。或有以破格請者。非有所窒礙。即不免有所觀望於其間。又或有志君子。慨然欲以事自任。而厯任未久。不特鄉

民未能深信。即一二士夫可與共事者。亦且慮其易於圖始而難與樂成。如是則一邑安得有賢宰。天下安得有善政哉。教化日缺而風俗日媮。職此之由。團練特其一端耳。然則就今日論之。團練不行。伊誰之咎也。夫團練者。三代後寓兵於農之遺意也。嘉慶初三省教匪之事。老師數載卒奉。旨舉行團練。寇以蕩平。其前效蓋可覩已。昨聞邑中一二練團之鄉。賊不敢犯境。地方居民帖然。此尤其近效彰彰者也。僕因論事故及之。執事熱忱救世。如遇當事有氣力者。可為痛陳也。賊已竄還北省。想與黃州股合。滌帥因三月岳州之敗。勇潰過半。自請部議。今水師盡以屬之陳總兵。更欲從近屬募勇近萬。始能成行。石曼卿主籍鄉兵之說。前人猶有譏其失者。而況收之烏合。得之俄頃。又倍不及鄉兵者半。此蒙前年所為言。近日之素兵用勇。而不免私有所疑也。執事以為何如。天津獨流之賊。掃除否。金陵潰圍而出。雖否。老成凋謝。命將無奇。廟算雖勞。籌餉難繼。蔓延若此。澄清何日。執事江蘇之行。何時啟程。如在蒲節後。猶可一圖良覲耳。無緣而論。聊布區區。臨楮神馳。伏乞鑒察。不具。

祭外舅馬悔初先生文

緬維癸卯。勳年十如。是冬婚成。東牀誼密。憶初從事。樂舞高齋。當時弱植。今已成圍。日月跳丸。不覺其久。愛我教我。期我彌厚。先後門下。受益甚多。況親如勳。尤深琢磨。

凡材之生兀於奇特。擿搏青黃。坐遭挫抑。長吉則知東野。則窮漁政是。淫天罰其躬。非此之訛。而奚為然。矧云素體魄。固神全。去夏染疾。歐血數升。勿藥有喜。養癰莫懲。秋冬之交。神氣凋索。長沙高君診視。約畧為數。屢言不利。明春嗟哉。斯疾而在斯人。獻歲以來。人事羈絆。元宵招飲。沈醉達旦。翼日病作。醫藥自主。元精枯槁。參苓罔補。中間小愈。強支自寬。一變何與。歐盡心肝。三月望日。自知不起。神色安定。烏乎已矣。人孰不死。死死貴令名。偉如先生。不負生平。先生為人。傲兀自喜。有不如意。唾猶泥滓。往日嗜酒。意氣豪爽。奇態雲幻。高論泉湧。邇來守約。與人寡交。嗣宗簡默。曼倩諷嘲。道光而還。士氣偷薄。矯振以義。寒寒諤諤。先生之學。邑里所稱。早歲聖壘。共擬飛騰。迺困場屋。未博一第。徙字悔初。冀成孤詣。徐庾清新。班揚瑰偉。適俗眩萬。去古則咫。凡厥所為。得力堅忍。冥心刻跡。拗力橫騁。惜未卒業。生也有涯。天乎人乎。吁可怪邪。佚老息死。蒙莊妙義。今即不息。胡佚可意。蕭然古寺。烏雀啾音。修竹萬竿。翠參豐尋。形藏幽林。神棲禪室。其慎蓋瓊。有待卜吉。城市真塵。久矣難居。病中斯言。猶舉示余。被髮入山。息機遠遊。耕田食力。讀書重本。我語諸孤。庭訓無忘。勿以小惡。而遂披猖。人多暇日。孫卿所憂。德成執成。視質孰優。我校遺文。篇殘簡斷。卷分為五。本末可按。經藝千篇。徵佚難稽。搜尋故紙。並付災梨。以終往志。以踐宿言。詩書不替。傳與後昆。

湘水之鞠。湘山之岳。有磐彼石。請紀生沒。先生知交。多世文碩。住懸屬辭。永壽貞石。今也百日。我馳我悲。謹具醇羞。泣奠陳辭。

祭羅幼松文

烏乎。我初識君。聞貞增歎。溫如其容。蕭然其色。迨與君久。意氣甚豪。有時益我。如飲醇醪。今歲讀書。就我室側。仲也憐才。熙然相得。我自塾歸。每就君論。滂心遠拓。遺講俱根。君之文章。精銳深浩。聞為詩歌。揮翰奮藻。我視餘子。所畏惟君。君雖彊項。乃過推勸。凡今之朋。聲華藻繪。惟君視我。不牽於外。君素體弱。時聞唸呷。羈人寒骨。信如君詞。平生落落。藏器襲錦。一日過我。入門伏枕。是夕獨歸。從此減餐。我往問疾。強支笑顏。中秋以後。骨虬病鶴。我去長沙。醫者是託。客中問訊。未知其詳。但聞神短。鎮日在牀。孰意別來。五十三日。忽傳君耗。愴然若失。謂仁者壽。胡為其然。人命危脆。豈不自天。猶憶七夕。唱酬如昨。投我瑤篇。自傷搖落。君亦不知。蠶死絲窮。諒哉善言。一讀難終。徘徊東閣。涕出偏漣。几覲詩書。歷歷在眼。月下花影。階前秋聲。音容疇昔。振觸平生。君叔有言。為君立後。并刊遺篇。以垂不朽。今世之英。誰能不思。思已焉哉。嗚咽陳辭。

南言一

陳起書

步兵登摺嶺之巔而歌曰。秋日欲落。木葉其脫。先知者誰。號寒烏雀。樵者聞之。謂步兵曰。子以摺嶺為汎。摺嶺之盜賊。子所司也。何子之無能也。曰。文司獄而武司捕。武捕而文縱之。則武有妄捕之罪。不捕而上告。又有廢弛之愆。五人守汎。地廣則巡之難周。而驛文之往來。晝夜不絕。上以安靜為名。故下畏大事而樂小事。化大為小。持小為大。不赦者多。縱逸勃谿者。困囹圄。衙署成市。非賂不行。竊賊則以為貧者之常業。強劫則以為恐生事端。是以千人持刀行私。而過摺嶺。余不得問焉。五人之力。不足以禦千人。而又有滋事之罪。非特余也。有司固然。汝不聞吾鄉之善搏虎者乎。其長在鎗。得虎而獻。有司曰。民間何得用鎗。是出於山中之虎。而不能出於堂上之虎也。後復有虎。善搏者閉戶不出。鄉之人笑之。非搏之技不精。搏之器不得用也。失其器。則虎不可搏。乃易搏虎之技。而搏鼠。終日不獲一。鼠晝伏而夜行。藏於壁而行於箱匣之底。無室無之一人不能盡搏。非搏鼠之難於搏虎也。故鼠與虎皆不得搏焉。曰。然則聽鼠之藏於室。虎之伏於山乎。步兵曰。搏虎以力。搏鼠以勤。治盜先治窩。去賊嚴去黨。在有權者。

南言二

樵者謂步兵曰余樵五嶺之巔山徑余所知也踰嶺為嶺南宜章其衝也架嶺南先守宜救宜之路若何步兵曰邾所以救宜險要在摺嶺余所司也然我之所守即為賊之所攻明由摺嶺救宜彼必盡力以禦陰由摺嶺之西黃毛摺嶺之東大隈以出其背焉蓋橫絕南北者嶺嶺自臨武入邾為高堂山西有小徑黃毛是也東為摺嶺起五蓋山其東之小徑則大隈焉過此則桂陽矣夫中原險要在水或在路所會歸之處邊鄙險要在山實在兩山斷而復連之處山龍也斷處峽也山防之法在斷龍征猛尤善猛善行山其伍散而不聚我聚而攻其一道則徑小難容眾散而攻其數道則彼盡力以圍我一進我仰攻則彼乘高以禦我登峰則彼圍其下擊東西奔擊西東奔擊首尾則上下四旁奔而我不能追斷其龍則彼無奔路龍之起也萬仞其伏也一綫所伏之處其水分流是謂之峽山路會歸之處也大龍之下小龍出焉其脈亦一綫龍斷則彼奔馳於此山而不能越山而遁入山先看水大水大峽之所出小水小峽之所出湖水則峽見斷而圍攻之節節斷節節攻如破竹然節破則竹自解夫猛可由貴州至常德洞庭可由貴州廣西至衡山寶慶至湘陰洞庭皆數百里不經州縣若五嶺則可由廣西永州邾桂大庾至閩浙數千里不經州縣橫絕南北者嶺嶺上泉分南北流故中無大水以界之邾縣在平地斷龍如斬蛇斬其中則分

為兩險要。大路大峽也。間道小路小峽也。摺嶺大峽也。黃毛大隈小峽也。不獨此也。陰平峽也。散關峽也。武關峽也。凡出奇之路無不出於峽者。看水知峽則嚮導出奇。可以意會焉。曰子嘗從事於猛。當其由江華而至常窳。何不言其法而斷之。何至出擾數百里。八排廣十里。何至聚萬人於中而不能戰。步兵曰。池塘墟亦峽也。海軍門不知而中伏焉。斷東西之水而南北皆山。故不得出。當今之事。言者不行。行者不言。養犬所以守夜也。而制之曰。爾其嚙以禦賊。無吠而驚子。夢也。賊在垣而噉犬於門。不得則罪犬。子欲我為驚夢之犬。而孰知我將為當門之犬乎。

南言三

有漁者歌而過曰。鱗有爪兮不能馳。魚有翅兮不能飛。囊為網兮而誰為之。錐步兵問曰。何子聲之凄以悲也。漁者曰。吾聞子與樵言則善矣。是以感而歌也。步兵曰。物莫不好生而惡死。深潭之藪。魚所歸焉。吾鳥知藪之樂於魚耶。魚之樂於藪耶。水之忘於魚耶。魚之忘於水耶。魚忘於江中之水。鳥知其不忘。釜中之水耶。子知魚之樂於藪。鳥知魚之樂於釜耶。子不忘藪中之魚。奚忘於釜中之魚也。漁者曰。物莫患於好貪而惡廉。人莫患於好譽而惡毀。蝦求食而無所依。知水母之無目也。戴之以遊。蝦謂水母曰。子真足以覆庇羣生也。水母亦自以為足覆庇羣生也。且得蝦則縱。

橫自如而孰知漁立於磯而網之蝦逃而水母不得脫故茂林之下必有陷窞而獸
聚焉深淵之上必有釣磯而魚遊焉其藏身之所即其失身之所則貪者終不得藏
也步兵曰子知獸之聚於林魚之遊於淵奚知獸之遠於窞魚之避於磯乎子立
於磯奚不知入於磯乎子知浮家之可以遠世奚知盜者之將以子舟為渡乞人之
將以子舟為薪而吾曹之將以子舟為差使也子以磯為機心烏知人將以子舟為
機事乎漁者曰草生牆上有蚓穴於牆下而食其土壤草無如蚓何也秋雨時至基
空牆壞而草受其殃蚓無所傷也復他徙焉哀哉草無損於牆而受之累也乃復歌
曰北風漸寒兮瀟湘欲波帆破舵失兮舟將奈何蒼梧雲沒兮淚滂沱步兵曰局中
多樂局外多憂信然

南言九

商曰余入子之室所謂刀鎗弓劍皆朽腐不可用何也步兵曰此數十百年所收藏
之物非余所得有也其造以官而取於民胥吏侵之匠役欺焉安得精糧餉之制定
於初而食物之昂日甚無半年之食而有半年之役大帥之來操也車馬之費驛館
之費飲食器用之費隨從贈賄之費悉出於餉及其操也復備賞軍之費兵餉賞兵
得復歸餉蜻蜓食尾腹飽身傷是無賞也無賞故無罰又終無出身之日偶有用者

非科甲即賄賂焉。故兵不習武。夫賞罰者劍之柄。武事者鎗之機。無賞罰。是劍去其柄。不習武。是鎗失其機也。而且僕隸冒之。虛餉侵之。故小城之兵。往往五六十人。而守卡致郵送捷。為其差使。故為遊民之藪。所以一聞調兵。民未驚而兵先亂。商曰。鄉勇何如。步兵曰。可暫不可久。可用不可恃。可守不可出。設兵所以衛民。今反以民衛兵。兵不衛民。民豈不自顧其家。為兵者以城付之民。立兵何為乎。恃以為長策。則烏合之眾。其弊可勝言哉。誘曰。田要親耕。子要親生。又曰。倩人代哭。不心傷。寄信求名。終無官。誠哉是言也。

桃核集殘彙序

彭子菊村。家貧無妻子。性耿介。工於文。為塾師以自活。每自館歸。必談飲數日。漸自道其寄懷之作。余性懶而善忘。今菊村死矣。彙遺失。其弟於朋友處。搜羅得數十首。余嘗讀書。蘇仙之雲中庵。菊村至。相與登仙桃嶺。見一石如桃色。如土而堅。外有紋而中空。搖之有聲。僧曰。此仙桃也。中有蝦者。有魚者。有生於水中。明如水晶。若有水而無魚蝦者。其水不竭。其外常潤。吾嘗得其一。置之書。一日夜而浸其半。凡吾所見於土人者。六矣。余曰。猶存乎。僧曰。碎之矣。菊村曰。請碎之。乃核焉。昔李後主得青石。硯墨池中有黃石如彈丸。水常滿。陶穀碎之。石破中有小魚。自是硯無復潤澤。則仙

桃養硯物也。去歲家人病。即或告曰。仙桃石中水。點之立愈。有貴人市之千金。余因索之數十。絕無有水者。夫養硯物之雅者也。明目益人之大者也。乃皆得於土人。及索之而反無。而其名又以生於窮鄉僻壤而不傳。菊村之詩其佳者多碎於俗人之手。而余僅見其核焉。天下以其生於窮鄉僻壤也。誰從而知之。徒令病目者索之不得而已矣。

彭菊村墓志銘

先生姓彭名陶字菊村。先世衡山人。父商於郴。遂為郴人。十餘歲時。父負債數千金。常累日不食以養父。父沒。為債家所迫。係於官者月餘。余先祖憐之。解其訟。因教之學。曰。子有造才也。見其容若病者。問之曰。無食。食之。年餘。補弟子員。去為童子師。而以文字正於余先祖。文日進。數年。食廩餼。是時館穀漸豐。而兄弟六人皆食於先生。且為之娶妻。長兄死。葬之。撫其孤。母又老病。醫藥甚勤。年三十六。母曰。汝以子與兄弟。故而無妻。其於嗣續何。汝其娶以慰子。娶妻踰月而母卒。踰年。妻又卒。貧益甚。乃不娶。而教季弟學。亦補弟子員。三兄死。葬之。撫其孤。而先生亦病。道光十一年。年四十三卒。無子。葬於黃茅嶺。父墳之側。死之日。朋友皆至。市人曰。彼皎皎自好。諸人胡為者。而哭彭先生。銘曰。

以孝友而貧以貧而無子烏乎惟天所使

公祭陳翥堂文

公酒人也篤於友誼幼同松心聽雲心講易有得因與松心論文補弟子員菊村與鹿泉飲不勝走告公公曰我其試之與之飲鹿泉曰子我畏友也松心曰叔何可以酒廢學公曰子何可以學廢酒天下多學而達者幾人乎吾懼子學之多也至省垣是時松心兄弟所交多知名士公見希蓮曰希蓮有道德氣希蓮告松心曰兄叔翥堂。天姿曠達可引以學松心曰病酒希蓮笑曰與吾同見修梅曰修梅長者吾尤愛其詩修梅曰翥堂樂哉吾不及其酒見積之積之曰翥堂太圓公曰積之大方見謙庵曰謙庵大有詩意謙庵曰翥堂大有酒意月喬困棘園中聞其為雲心友也扶持之月喬告松心曰昨幸遇翥堂郴州多善人其於朋友之朋友且如此後數年而與玉圃挹謙聚於雪卿所每酒酣雪卿吹笛公唱大江東去舉座皆笑曰何笛有腔而詞無腔也松心兄弟讀書湖北公與諸友數日一至必大醉諸友去而公獨留諸友曰翥堂不能行乎公曰有餘酒將以賞月耳雲心之官去松心獨居湖上積之松洲煥之至松洲曰吾久耳翥堂酒名請與之角三人者不能勝公謂松心曰諸友醉矣然吾不可不盡意乃連飲數十觥而歸中途雨大至風滅燭電光燎人眉目公大呼

醉歌行。聲與霄相唱和。積之失足落田中。公扶之歸。笑曰。吾終日醉。實終身不醉也。修梅病於榻。公請懷堂醫之。懷堂曰。修梅將不起。子曷勸之歸。公謂修梅曰。吾見子欲哭。修梅曰。何哭。公曰。子歸欲哭。子不歸欲哭也。修梅曰。吾歸矣。雖然。子其痛飲。以送修梅歸而死。公張之。菊村病。公治其湯藥數月。彌留時。諸友皆至。公曰。我死。諸友皆來。諸友疏於事。公為菊村衣冠。悉稱葬之。曰。諸友皆哭。公大笑曰。菊村可以死矣。哀哉。誰知今日竟祭公也。介生曰。吾兄之死也。公愛松心之墓誌銘。今鹿泉飲巨觥。雪卿吹笛。松心歌詩以侑。四座默然無語。鹿泉曰。諸友無語。公必大笑也。吾輩之言。公聞之。公之笑。吾輩不得聞之矣。哀哉。鹿泉又曰。忽忽十餘年來。月喬雲心入都。積之謙庵遠處。希連菊村。修梅死。別士辰。子病於省垣。公曰。鹿泉其死乎。子時頗自懼。孰意歸而公竟舍我以去也。哀哉。子醉不能文。松心其書子語以祭。

昭德侯祠記

柳自四月不雨。至於五月。米價驟騰。知州事姚公悉心條畫。禱於昭德侯而得雨。禾盡起。價復平。因立侯祠於橋井觀之左。以報焉。公之善救柳饑也。子曾贊之。謹將已行未行諸策。詳書以告後人。曰。救荒之策。招商買米為上。驟夫運米次之。勸紳士買米。平糶次之。嚴強糶禁游民。又次之。必不得已而發倉。又次之。莫不善於平糶。米價

郴居五嶺之顛山高田少仰食於衡湘五月之杪米價驟昂桂陽州出示平價米至日少民祈發倉。郴商慮發倉則米必賤又新穀將登商咸不行。予以郴四十萬人就倉穀二十餘石何足濟乃通計商米之在郴者在衡湘者在途者共八千石而未陽永興去其一桂陽州臨武藍山嘉禾去其一宜章興甯去其一。郴不能十日食早禾已壞中禾尚遲月餘二十日內將安食。況是時衡米斷阻湘來往經月不先時計之食盡無策矣。公乃招商人獎以花紅有願買千石者其日聞風者數十人皆給路引得數千石焉。若郴亦平商米價米必不來不惟價不能平且食不可得矣。不平價而價自平招商之力也。又五月初旬郴米價四百八十錢而瓦窰坪實止三百八十錢蓋瓦窰坪至五湖瀾船載米五石石三四百錢夫運於城石又數十錢公則不僦舟而僱騾石二百錢運價少而米來多矣。公又慮米出於商而錢出於典。郴一典而桂陽州之典復停仰給於郴。郴日質千金錢必盡乃諭典運錢於衡給路引而載以騾錢有出而後米可入也。又勸紳士買米八百石平糶又以游民易動為嚴刑強糶數人乃復靜。昭德侯適至而雨降。郴得不成苗焉。夫民祈發倉而公不急於發倉何也。人知荒之須穀而穀無從出知倉之有穀而不知倉無益於郴。倉穀八千石存七糶三官不能自發。某大府又咨部焉往返數千里新穀登而文移猶未至也。又況胥吏

之費。大府之費。委員之費。銀錢折換之費。米去其半。追買補而費亦如是。米未及民。官已憊矣。夫救荒無奇策。發倉平價言之甚美。行之甚速。古人有增價以招四方之粟。而騰湧頓息。若彼誠洞於物情。而不邀一日之虛譽哉。若夫未行而可行者。五隅販米。六鄉貸倉。近城無糧者多。先分五隅造門牌。二日而成。約二千張。以十口計之。得二萬人。人人各一升。千家得一斗。二百石已足。人各三升。千家得三斗。六百石已足。二百人領米五日而畢。不畏擁擠也。六鄉有糧者多。惟門牌難猝造。不能周知。戶口之多寡。家計之上下。令民執上年斗升合勺餉票。依數發之可矣。施粥之地。宜分或勸富戶。令人擔粥。隨地給發。又施藥餌。施棺木。收小兒。禁燒鍋。熬糖。禁私宰。禁嫁娶宴會。繁靡。禁僧道道場。禁聚眾演戲。勸種冬蕎。嚴察流民。謹稽保甲。皆宜於邨者也。夫救荒之策。先事為上。當事次之。事後為下。候邨人有桑梓之愛。

蒯徹論

楊源漢

吾觀蒯徹之說淮陰侯。而歎高帝之詐也。蓋徹之說信。乃帝與良平等密謀。而陰遣之以伺其動靜者耳。當是時。信既自立為齊王。項王又使武涉往說。欲與連和。楚漢之命。皆懸於信一人。帝安得不懼。於是陰遣辯士。以窺其向背。若何。倘信而無背漢之意。則微其兵。擊楚而項王可除。若信而有背漢之心。則釋楚擊信。而先除其腹心之害。毋使為內憂。帝爾時之忌信。固儼然一勁敵。而十倍於項王矣。使信果有知人之哲。則當蒯徹進說時。立斬其首。懸於軍門。因令將士曰。君臣之義。萬古不易。吾既事漢。雖肝腦塗地。所不容辭。豈儒蒯徹以亂言惑我。已梟其頭於麾下。諸君如炫於利害。不力攻楚。而輔漢者。請齒此劍。如是則高祖之疑可釋。良平之間可消。而信亦得世為大將。永祚元勳矣。乃聽徹言。一則曰。吾方念之。再則曰。猶豫不忍。雖力拒徹。而因循之見。不免含糊於語言。帝之殺信。實決於此。豈待陳豨謀反。假手呂后。而始以疑獄誅之乎。信歷數年。猶不知其詐。反曰。吾悔不聽蒯徹計。為兒女子所擒。豈非夢夢哉。余又論之。假令信用其言。即舉兵以反。其柰之何。曰。想當日帝籌之熟矣。蓋信欲反。必用徹為謀主。帝之使徹與武侯之用馬岱。以制魏延。同一機權作用。不反則其死遲。反則其死速。斷不能出徹之掌握也。

漢文帝佐百姓論

漢初民不聊生。肝腦塗地。至孝惠猶未復。及文帝即位。始被厚澤深恩。而登於仁壽。其初詔曰。老者不養。何以佐天下。子孫孝養其親。再詔曰。有可以佐百姓者。率意遠思。無有所隱。大哉王言。君也。而謂之佐。真三代令主。而無愧於綸綍之音矣。余因推廣佐字之義。為萬世牧民者告曰。天有日月星辰雲雷風雨之屬。佐百姓。使天不能佐。則上帝曠其職矣。地有河海山陵平衍原隰之類。佐百姓。使地不能佐。則后土失其司矣。人主上承天地。統馭蒼生。則以制度典章紀綱法度佐之。一不得其宜。而災禍立見。天子之功。過有天地。糾之。天地之功。過有道。衡之。故言其分。至尊莫如天地。至貴莫如天子。本非民所敢抗。而論其理。天地與帝王。罔非斯民之佐。雖偏被生成。普施博濟。足為赤子之功臣。而不得自尸其功也。且夫天地窮於佐者。須人主代之。人主窮於佐者。又須牧民之吏代之。禮官以佐其冠昏喪祭。樂官以佐其康樂和平。農官以佐其飲食供奉。刑官以佐其曲直從違。由冢宰而至小吏。莫不各有所佐。偶失其職。即干天譴。背王章。激眾怒。不為民變。而為官變。不為民犯官。而為官犯民。身名俱黜。青史遺羞。求為百姓之役。而不可得。悔無及矣。余故原本天地為說。而上至帝王。下逮一命之士。皆以文帝之言為龜鑑。而無得罪於百姓焉。斯億萬世太平之

幸也。

唐太宗放宮女論

賀善贊曰。太宗令德善政。莫大於放宮女一事。余謂太宗秘計險謀。亦莫慘於放宮女一事。厥後武氏稱制。殺唐子孫。幾盡。皆其陰禍。惜古今人共為所愚。無有能察之者耳。按綱目。帝自稱太上皇。世民嗣位。即繼書放宮女三千餘人。太宗開府秦邸。不過藩王。立為太子。未久。便即位。安得遽有宮女三千餘人。淒淒楚楚。舊宮一空。踽踽涼涼。上皇飲泣。太宗只圖洩其一日之憾。而竟不為高祖少留餘地。獨何心與。然而古今人竝無以此議太宗者。何也。曰。放宮女。美舉也。帝意好名。故援美舉而欺之。以其方欺。宮女必以擇配為辭。而宮女樂就。天下必以怨女為解。而天下感恩。孰知馳歸女家。則流離於道路。遭媒議合。更幽辱於教坊。名媛等於優倡。有司爭為奇貨。賦標梅者。或時登鬼錄。感桃夭者。不免遇匪人。人主清心寡欲。與其見放於後。而致干天地之和。孰若勿多娶於前。而永完其室家之好。歷代所書放宮女一事。史臣雖噴噴稱為盛德。吾不取也。況太宗借此報怨。其困苦媒孽束縛拘囚之慘。為害必尤烈乎。夫女子陰物也。陰毒所凝。鬱積難解。不變為異類。必化為妖魔。武氏者。即前後六千餘人之怨氣所結而成者矣。不然。長孫皇后家法森嚴。太宗功德在人。幾於刑措。

位極人臣。實非尋常武夫悍將之比。當肅宗即位靈武。命于儼為長史。同平章事。其時已為宰相矣。及入西京。後尋進爵為王。代宗時加尚書令。德宗時尊尚父。加太尉。兼中書令。出將入相。公皆任之。則鋤邪去惡。正其職也。何所憚於杞。而畏害若是。雖杞之心險。未肆其毒。爾時無可聲之罪。然公亦宜密疏於君。使朝廷知備。為防微杜漸之舉。在公既不失憂國之忱。在杞或不至長惡之漸。國與家兩受其福。此策之至善者也。公胡以計不出此。他日杞為相。陸宣公極訖其奸。李懷光數表其罪。德宗始不得已。貶杞於新州。所謂小人已得志。其去之實難也。孰若禁於未然者之為得哉。吾於是而愈不能不為公惜矣。

唐肅宗即位靈武論

肅宗之即位靈武。庶幾聖人所謂可與權者也。當是時。上皇西奔。中原失守。人心洶洶無定。使太子猶膠守故常。萬一裴冕杜鴻漸等去順歸逆。諸路勤王之師。不受節制。後世又以太子為何人乎。故上皇縱無傳位之命。太子臨機應變。暫即尊位。以維繫人心。亦無不可。爾時天下為重。承襲為輕。自有權衡故也。昔者舜不告而娶。君子以為無後。況廟社所關。尤大於無後哉。夫天下不可一日無主。自靈武即位。後大臣起兵者。輻湊而至。河南江淮諸道。知上即位。殉國益堅。然則兩京恢復。卒返舊都。謂

皆肅宗即位之力也。吾聞靈武使者至蜀，上皇喜曰：吾兒應天順人，夫復何憂！當時名臣如顏魯公、李鄴侯、郭汾陽等，皆不聞以即位為非。至華陽范氏始謂太子叛父，致堂胡氏譏其欲速見小，拘牽文義，不明大體，非通論也。

國朝文匯丙集目錄

卷三十

陸心源字存齋浙江歸安人咸豐九年舉人官至廣東高廉道有沃顧堂文集

原學

李廣論

張釋之不拜番夫論

魏刺史文集序

送凌子與之上海序

贈憫之伯鉞序

上吳子必閣學論國朝古文書

與楊見山太守書

寫經堂記

是山園記

重建鄉忠介公祠堂記

重修化州范龍學墓記

一

一

二

三

三

四

四

五

六

六

七

七

徐莊愍公別傳

八

趙忠節公別傳

九

二忠傳

十

署紹興府知府廖君別傳

十

凌少若先生別傳

十一

節孝許氏傳

十二

書張念哉夫人遺事

十二

書鄭東里遺事

十二

記卞小足遺事

十三

徐侯齋先生像贊

十三

記化州橋

十三

記緬茹

十四

記異

十四

亡弟子壽權厝誌銘

十五

徐幼青誄

十五

嚴長字滄生號遠有墨沈江吟桐齋文鈔

苛政猛於虎論 十七

沈雨梧先生南游草序 十七

邱母嚴孺人家傳 十八

高心夔字碧湄號陶堂江西湖口人咸豐九年進士江蘇知縣有遺文一卷

游君山記 二十

滙夢軒記 二十

灌園記 二十一

許氏玉芝園記 二十二

書戴貞女 二十三

石鐘山銘 二十三

代理江蘇嘉定知縣劉君墓誌銘 二十四

陳爾幹字仲植號柏堂浙江山陰人咸豐九年舉人有柏堂詩集

進言論 二十六

楊象濟字利叔浙江秀水人咸豐九年舉人有况庵文存

國朝文匯

卷三十

目全

二

國學扶輪社印

裕財策

二十七

汰僧道議

二十八

陳宗起

字敬庭江蘇丹徒人有志居文集

范文正公王荆公合論上

二十九

范文正公王荆公合論下

二十九

徐

彞字華農湖南長沙人武豐朝生有南州別墅詩文妙

重刻大學日程序

三十

復吳荷屋中丞書

三十

楊球光

字子鳴湖南武陵人真珍子諸生

送介休師還都供職序

三十二

國朝文匯丙集卷三十

原學

陸心源

學也者。學為君。學為民。學為父子兄弟夫婦朋友者也。三代而下。有小人之學。有異端之學。有小儒之學。有大人之學。約縱連橫之說也。堅白同異之辨也。詞賦之類。於佻優也。佔畢之誣。固聖賢也。內不足以治其身。外不能以益於人。苟以趨時好。悅人主。竊顯官。惑愚眾。此荀子所謂以學為禽犢也。皆小人之學也。黃老之清靜。楊氏之為我。墨氏之兼愛。申韓之刑名。釋氏之慈悲。用其說亦足以立國。原其心亦主以救偏而濟人。然而畸於先王之教。悖於聖人之道。皆異端之學也。研訓詁。通假借。證名物。析異同。但道伏鄭是。甯言孔聖非。是為考證之學。文必飾。詞必修。皮傳孔孟祖述。韓歐詡謝然矜為因文見道者。是為文章之學。徐言而緩步。儒冠而縫衣。析性命之精微。辨朱陸之同異。囿於一先生之學。不博考於聖人之通者。是為性命之學。是數者幾於道矣。然而考之於古而宜。推之於今而未必宜。著之於言而然。稽之於行而未必然。修之一身而優。措之天下而未必優。皆小儒之學也。若夫大人之學。則何如。學也者。學為君。學為臣。學為父子夫婦兄弟朋友者也。上究今古興衰之故。中通宇宙利病之情。下嚴身心義利之界。若漢之賈生董生孔明。唐之陸敬輿李鄴侯。宋之

范希文濂溪明道橫渠考亭止齋東萊元之靜修。本朝之亭林稼書是也。夫是之謂大儒之學。

李廣論

古之所謂名將者。必其仁足以撫衆。智足以料敵。勇足以禦侮。義足以著節。而後可以成非常之功。垂無窮之名。非苟焉徼倖以成功者也。史記之為李廣立傳也。著其為名將而惜其數奇。後人亦多從而和之。以愚觀之。廣蓋不仁不義無智無勇之人。安得為名將乎哉。何則。廣以衛尉為將軍。為單于所生得。則無勇。霸陵尉以怨而被誅。隴西羌既降而詐殺。則不仁。為漢驍騎都尉而私受梁王印。則不義。身為大將。昧於輿地。至迷失道。則不智。不仁不義無智無勇。而可謂之名將乎哉。且夫廣之受任。不為不重矣。七為太守。四為將軍。其為太守也。上郡則得之中貴人之口而已。北平則徒有飛將軍之號而已。上谷雲中隴西北地。碌碌無足道。其為將軍也。伏馬邑而無功。出定襄而獨無功。出雁門而大敗。出東道而又幾於敗。為將若此。可謂無復人心者。以司馬穰苴之法論之。擅斬固誅。失律亦誅。殺降固誅。懷貳亦誅。慢令固誅。負恩亦誅。廣之所謂名將者。果安在也。史公欲為之辭。而不可得。於是創為數奇之說。以眩人。果爾。數不奇。則雖白面書生。紈袴子弟。寄尊閣而可以成功。數奇。則雖節制。

如桓文仁義如湯武亦不能取勝。豈其然乎。且史以廣行無部曲行陳未嘗遇害為稱。則又謬甚。易曰師出以律。荀子曰秦之銳卒不可當桓文之節制。節制不明而可以取勝者未之有也。廣之無功亦正坐此。史公反以為美談。何其謬邪。且為將無赫赫之功。僅曰未嘗遇害而已。則世之巧於避敵者皆得為名將矣。烏乎可。雖然史稱廣得賞賜。輒分戲下。飲食與士卒共之。固非慳於財者。後之為將者不恤士卒之苦。又從而侵剋之。迨乎所向無功。亦藉口於數奇之說。此又廣之罪人也。夫

張釋之不拜嗇夫論

張釋之為謁者僕射。從文帝登虎圈。上問上林尉諸禽獸簿。十餘問不能對。虎圈嗇夫從旁代對甚悉。欲以觀其能。口對響應無窮者。上詔釋之拜嗇夫為上林令。釋之對曰。夫絳侯周勃東陽侯張相如。言事雖不能出口。而皆稱長者。豈數此嗇夫謀謀利口捷給哉。陛下以其口辯而超遷之。臣恐天下靡靡爭為口辯而無實也。上曰善。乃止不拜嗇夫。君子曰。釋之可謂知大體矣。雖然其識則是也。其言則非也。夫所患於利口捷給者。為其徒能言而實不可用也。今嗇夫之才可用與否。釋之蓋不知也。惟以其能言而逆斥之。夫嗇夫居上林。而因知禽獸之數。其意非為天子之問。欲以言語取上知也。無所為而能之。其才宜必有過人者。而釋之乃謂利口不可用。夫以

才者為利口。則是尉之居位而曠其職者。反得稱之為慮謹矣。而可乎。且釋之以勃相如為言。亦非也。勃相如為天子大臣。輔天子平治天下。宜持大體。去小察。非嗇夫下吏比也。勃嘗與陳平見上。上問天下決獄錢穀之數。勃不能對。問平。平曰。有主者。上曰。苟非有主者。而君所主者何事也。對曰。陛下不以臣駑下。使備位宰相。宰相者。佐天子理陰陽。順四時。親附百姓。使卿大夫各得任其職焉。上稱善。夫宰相之無專職。以有有司在也。使有有司皆效宰相之所為。則天下殆矣。尉官上林主禽獸。而不能舉其數。其失職則甚矣。豈勃相如比乎。且人主之治天下。其道在用人得所而已。如使才者以能言見斥。不肖者以充默得留。則天下之有才者懼矣。是猶宋人之求美玉也。有鬻於市者。責其不當炫玉。棄而不顧。夫責其炫玉可也。遂疑其玉不美。不可也。釋之之言。何以異於是。故失一嗇夫不足惜。使天下之士聞之。皆以有才為戒。而以泄沓充默相尚。則其為失大矣。釋之於是時。誠使嗇夫暫守假職。以察其行能。治狀既白。然後官之。否者斥而退之。則上無失人之患。而嗇夫亦不得倖進。今釋之言不及此。吾故以為非也。雖然。釋之之意。非為嗇夫也。夫文帝賢主也。然而倖臣鄧通趙談之屬。猶接踵而並進。今又以嗇夫能言而官之。彼世主之賢。不皆如帝也。苟以一言之善。進用其私人。如嗇夫之比。其害豈不甚哉。故因其端而逆折之。不使後世

得所藉口。此釋之意也。釋之可謂知大體矣。

魏刺史文集序

余年十五六。即聞當代賢豪魁傑之士。首推邵陽魏默深先生。後得先生所著詩古微聖武記海國圖志。讀之。益信先生之學。實事求是。可以傳。可以行。余益心儀其為人。既相見於武林旅舍。時先生方患病。委頓甚。而四方之志未衰。余出所作藏言就正。先生擊節歎賞。比之賈誼崔寔。以起後相期許。因出所著文集命余序之。余思古者一代之學。即一代之治。故時之所謂士者。必考其典章。明其阨塞。而後知其利弊。處之絃誦佔畢。出則為條教號令。夫是以聖如孔子。必曰郁郁乎文哉。吾從周。而夏殷之禮。則僅曰學之而已。噫。士豈徒貴知古哉。後世儒者。不明此義。談心性者。薄訓詁。講考證者。鄙詞章。各執一端。不相通曉。抗顏自命為大儒。人亦羣然信之。而於兵刑禮樂之要。安內攘外之方。則瞽然而不知。一旦加於人上。求非所學也。學非所用也。儒之所以為詬病乎。豪傑之不作。不亦久乎。先生少負異資。博涉經史。百家。近及國朝官書。素牘。旁逮歐羅巴人所著。莫不究其所以然。而求其可以行。居嘗憤時感事。奮欲有所樹立。穆然於秦皇漢武之所為。故發為文章。古勁道。俊奇氣。勃勃精者。可以羽翼六經。粗者亦與國家大政有裨益。非求工文句間者比矣。嗟乎。先生抱

用世之具。卒以盱衡抵掌。縱論時事。不為時貴所喜。僕僕半生。需次以老。徒令海內賢士大夫。識與不識。想望丰采。而終不得一被其澤。豈獨先生之不幸哉。聖天子思得奇偉非常之士。共濟中興。他日求賢詔下。足以副旁求之意者。舍先生其誰與歸。

送凌子與之上海序

詩必得江山之助而愈工。故士之無志於世者。天往往迫之。使不得不出。俾得極天下之大觀。以開拓其心胸。而詩之境乃臻於極。人但知天之窮其身。不知將昌其詩也。凌子子與博學能文章。尤長於詩。所居秋風破屋。藏書數千卷。古畫百籤。琴一張。劍一具。法帖鼎彝數十種。子與日哦詩其中。暇則澹墨作畫。若將終身焉者。嗟乎。子與苟足自給。雖有萬乘之樂。亦不以此而易彼也。丁巳秋為飢所驅。將有上海之行。夫海天下之大觀也。自古騷人文士。往往欲一至其地。不可得。而得至其地者。或畜於文辭。上海地瀕海。皆商賈之所輳聚。惜無文章奇偉之士。以發其奇。天其或者有意於子與邪。子與行矣。端居多暇。買舟絕黃浦。亂清水洋。望蓬萊方壺。魚龍之出沒。雲煙之變幻。潮汐波浪之涵湧。層樓海市之離奇。俶詭莫不目擊而身親之。吾見其詩之日工也。他日朔風獵獵。一棹歸來。吾將倒行篋而索詩矣。

贈佃之伯鈺序

今所謂從龍舊族之子弟。吾得而見之矣。享舊德。食租稅。奇衣婦飾。鞞鷹而鬪。鷄走輕車。策駿馬。狎優童。擁嬖女。翠鞵珠珞。互相誇耀。羣居終日。言不及義。比比然也。其上者。肆趨蹌。習應對。奔走形勢。伺候炎門。唯諾以為賢。談諧以為能。典章之不習。詩書之不知。循資而按格。積食而計勞。上可以致卿貳。下不失為典郡。如是而已矣。又其上者。諷誦乎四子之書。涉累乎五經之文。研究乎高頭講義。學製乎枯帖時文。出就場屋。與諸生較一日之長。幸而得之。亦足誇其儕偶。而榮其同人矣。又何知道德性命之微。修身齊家之要哉。佃之年方弱冠。抱負不凡。予於劉南鄉侍御所。見其詩而器之。介而過訪。與之言。器識之遠。議論之高。非中人以下所能及。尤潛心於宋儒之學。嗟乎。此余所求之先生。宿儒而難必者。不謂於佃之得之也。佃之勉乎哉。昔王文成童子時。其父攜至京師。諸貴人謂宜以第一流人自待。文成問何謂第一流。諸貴人皆曰。射策甲科為顯官。文成莞爾而笑。恐第一流當為聖賢。諸貴人乃大慚。今天賦佃之以才。又能自拔於俗。廓然志於古人之學。甲科顯官。固不足為佃之道。即三代以後。儒者亦不足以圍佃之。必也存先憂後樂之懷。治修己安人之業。以循至於所謂聖賢者。佃之勉之而已。

上吳子必閣學論國朝古文書

前蒙賜書。獎飾逾涯。至以班馬韓歐相期許。愧何可言。愧何可言。源少而不學。長喜為詩古文辭。然祇以自適其意而已。不敢妄擬古人也。閣下不以為不肖。又從而譽之。過矣。至於國朝諸家文集之得失。亦嘗博觀而涉其涯涘矣。既辱下問。請略為左右陳之。今眾所推古文作者。前則勺庭壯悔堯峰。後則望溪惜抱。求其可與八家抗衡者。勺庭氏而止爾。然猶不免於體下。其餘或失不勝得。或得失半。或得不勝失。綜而計之。約有三等。崑繩之文厲。從老泉入。其失也肆。竹垞之文古。從曾王入。其失也局。望溪之文厚。從歐曾入。其失也竊。惜抱之文潔。從歐柳入。其失也柔。子居之文堅。從秦漢入。其失也矜。茗柯之文醞。從曾王入。其失也薄。海峰之文峻。從韓蘇入。其失也兒。此皆失不勝得者也。南雷之文從剡源入。其出也似廬陵。其失也率。湛園之文從潛溪入。其出也似歐似曾。其失也支。堯峰之失。毗於惜抱而加狹。雪苑之失。毗於崑繩而加浮。穆堂之失。毗於望溪而加冗。梅崖之失。毗於海峰而加俗。亭林之樸勁。躬菴之雄壯。其美不同。而怒幾於罵則同也。異之之學。賈大紳之學。荀其美不同。而學而未至則同也。牧齋之俊逸。謝山之宏肆。其美不同。而時涉粗雜則同也。二林之明暢。臺山之古勁。其美不同。而好孱禪語則同也。此皆得失半者也。至若生甫左

海之於昌黎。愚山青門之於柳州。少渠軫石石莊邦士午亭椒園之於廬陵。鶴舫潛菴在陸春融貫一之於南豐。六雅遜菴三魚改亭之於東坡。小硯碩士鱸江洲甫之於震川。或不專力於文。或專力於文而力不逮。故所得不如所失也。隨園之文。最為流俗所喜。其破律敗度。夫人而知之矣。然於南豐所謂智足以達難知之意。文足以通難顯之情。蓋無愧焉。蓋古文有理有法。理明而法不足以文之。則弁鄙而不辭。語錄之文是也。法立而不積理以出之。則放誕而無止。策士之文是也。是數十家者。於古文之理法講之熟矣。特所造有至有不至耳。愚淺之見如此。閣下倘不鄙而教正之。幸甚。

與楊見山太守書

庸齋兄台左右。昨拜惠書。深以弟前次到蘇。未入季長之室。為憾。弟疏放性成。不以窮通改節。遊屐所至。興盡即歸。然於執事則自有說。去秋薄遊吳下。懷刺登門。知有竹林之遊。詰朝請見。閣下面告以例不答拜。夫遊戲不吝輕輿。而故人獨靳傾蓋。已無解於晏嬰之善交。若謂執事以含糊銜秩。便當仲蔚閉門。豈弟以專擅削籍。反應脚鞵手版。望門投謁耶。此即援執事之例以事執事。無足責也。承示富貴陽燄。專引易林為證。非深於小學者不能鄙意以為易林之陽燄。非即周禮之陽燄。周禮之陽

燧又非專文之陽燧。易林言逢時者甚多。如逢時春草。燧基逢時。逢時遇主。逢時得位。鄉歲逢時。逢時得當。皆與下句文義連貫。陽燧火鏡也。見內則釋文。火鏡逢時。又何富且尊貴。即謂火鏡為司烜所取。見用王朝。如祭祀之芻狗。尊貴則可矣。何富之有。火鏡逢時。如人之遇主。猶勉強可通。若曰火鏡富貴。富貴火鏡。施之火鏡之銘。則可施之專文。則不辭。遂之本訓為亡。為遁。引伸為往。為進。轉注為成。為生。假借為緣。為鏃。為隳。隳之本訓為守烽火之亭。均無火盛之義。漢儒說經。碣守師說。執事宗法。漢儒果何所本乎。竊為易林之陽燧。當作生長。遂成解。漢書郊祀歌。青陽開動。根莖以遂。此二語。當是易林確解。言人之遇時而功成名遂。如物遇春陽而遂生也。移之專文。亦尚可通。若以為取火之陽燧解。易林已覺辭費。釋專文則斷不可通。陽燧之正字為鏃。說文。鏃。易鏃也。从金隊聲。經傳多以遂燧為之。與守烽火亭之隳迥別。阮氏校勘記。謂作燧。作隳。皆隳之誤。竟以隳為陽燧之正字。不知說文有鏃字矣。謬甚。執事尚引以為證。無乃怵於故大學士之尊貴而曲從之歟。君子是墓專出土。祇存其半。下端有莫作二字。其為莫氏墓。專明甚。莫氏為長興巨族。近出漢晉各專。為莫氏作者甚多。鄙著所謂缺姓者。乃殘缺之缺。非闕疑之闕。不然。君亦姓也。何不釋為君姓。字子是乎。第非敢護前說。亦欲商量邃密耳。所謂漢專拓本。有不甚可靠者。有

新得而專錄所未載者。今拓奉數紙。乞察入馬氏殿當。乃陝西新出土。執事能為考其源流否。附上秋室集兩冊。勿再誤為辛占所贖。幸甚。

寫經堂記

聖人之作六經。將使人知君臣父子之禮。治國修身之要。非徒文字章句已也。遭秦燔書。六籍幾滅。壁藏口授。同異紛然。有大儒者出。初讀為之例。以正其謬。初讀若之例。以通其段藉。而治經者。始不得不以小學為急務。六朝而降。此義漸昧。學者務趨時尚。兩漢諸儒之說。傳習者寡。一變而為貞觀之正義。再變而為熙甯之字說。三變而為新安之傳注。四變而為永樂之大全。其敝也。博而越通。加以傳鈔之異。板本之謬。改經造經之謬。妄而經學或幾乎息。及國朝大儒。理漢儒之舊說。訂為正俗。諸經之異同。渙然以釋。而依坳者流。又初為新奇可喜之說。以炫人耳目。其敝也。歧而不一。吾友姚君子展憂之。思放劉子奇中文尚書之例。定諸經為中文經。而以諸儒之說。坳其下。如漢講石渠故事。為中文經議。因名其所居之室曰寫經。余甚偉其志。自聖人沒而微言絕。學者各守一家之說。不相通曉。數百年來。漢宋之爭。幾於聚訟。而漢與宋之中。又各自為門戶。不求聖人作經之指。務相譏刺。以取名。嗟乎。此聖學之所以不明。而經術之所以日敝也。必有人馬出。而集諸儒之大成。以上溯聖人之意。

而不斷斷於文字間者。吾願子展勉之而已。

是山園記

是山園者。明主事李霜回之別業也。在長橋烏盆巷。地僅晦餘。中有是山堂。堂前有池。園三面環之。以廊。築時花畦。小有邱壑。霜回於宏光中。由江陰縣知縣遷禮部儀制司主事。國亡歸里。因池為園。日與潘天行。沈宋圻。李直器諸人。觴詠其中。自號是山石嬾。有終焉之志。徐侯齋先生避地吳興。曾主其家。侯齋與霜回書。所謂以苕溪為桃源者。或即指其地也。未幾而有沒籍之事。莊廷鑑者。南潯人也。得朱文肅所撰明史概。延諸名士續成之。而霜回為之敘。其文則同里陶鑄代作焉。莊氏書語多悖逆。歸安令吳之榮發其事。事聞。凡列名書中者。治以叛逆律。霜回以敘文與焉。緹騎至。方宴客於園。倉皇受逮。或謂盍證陶以為自脫計。霜回不可。遂死西市。一門死者十餘人。嗚呼。當星移物換之秋。明室遺臣。鮮不攀龍附鳳。爭先恐後。霜回一尤散郎官耳。自以身食明祿。不忍昧心。日與二三遺獻。酬對於荒亭木末之間。迹其所為。雖不能與侯齋諸公比高量潔。不可不謂之志士也。迨乎事及。噬臍。闔門并命。閉口就死。絕無怨言。亦可傷矣。論者必據據其失而訾。誓之。不亦甚哉。不亦甚哉。霜回沒後。惟一孫。偽為異姓子。得免。園歸姚氏。今是山堂題額。亦沈方伯世祖為姚氏書。蓋非

霜回之舊云。霜回名令哲。歸安人。崇禎十三年進士。

重建鄒忠介公祠堂記

古之君子。志未伸於當時。澤未被於斯世。往往所過之地。百世而下。猶動人流連慨慕之思。且與捍大災禦大患者。並列祀典。此不惟其人可思。其有功名教者深矣。明自永宣而後。閣勢漸張。成化末年。萬貴妃擅寵於內。李孜省輩亂政於外。大臣若萬安劉吉尹直輩。且因之以進。庶寮以下。靡然成風。士氣幾於不振。朝事幾於大壞。孝宗嗣位。佞倖雖誅。而安等猶在政府。君子小人消長之機也。鄒忠介公年少負奇。數陳讜論。疏請斥退安吉輩。而薦王公恕彭公韶王公竑。其言光明磊落。洞中時弊。庶幾於賈誼劉蕡。後吉構劉概之獄。中公貶石城千戶。吏目以卒。讀史者均為扼腕。然安吉卒。遂三原。旋長吏部。引用正人。布滿朝列。遂使宏治之政。為有明最。非公之言。引其端歟。公抵貶所。秦公紘開府兩廣。檄公修書。未幾卒於順德。吏目允員。公在貶所未久。故政事不著。善乎孟子之論伯夷曰。奮乎百世之上。百世之下。聞者莫不興起也。公學問文章。足以廉頑立懦。即祀之賢宗。無愧況於宦迹所經乎。石城故有祠。為明巡按某公所建。歲久傾圮。余少慕公之為人。今左遷高涼。又為公過化之地。撫今思古。惻然於懷。因檄石城張令作而新之。既成。張令以書來告曰。祠故在千戶所。

後今即松明書院舊址改建。經始於某年某月。落成於某年某月。請為文以壽之。石。余何敢辭。嗟乎。當吉構劉概之獄。不第陷公於罪。且欲誣公名節。其用意可謂深毒。豈知奸臣之智計。不能奪天下後世是非之公。迄今海角天涯。馨香不替。若吉與安直輩。雖位極人臣。亦終不免於死。徒令史臣載筆。指為小人之歸。而子孫亦羞道其姓氏。以視公之得失。為何如。然則世之欲以智力取勝者。非感歎。

重修化州范龍學墓記

自章惇興元祐黨人之獄。一時正人。貶斥盡淨。其他能文章著聲譽者。無不與焉。而為惇所最恨者。莫如劉元城。范龍學。元城得生還者。幸耳。龍學則竟終戍所。余嘗讀而悲之。化州城西大路一里許。石牛嶺下。有范公墓。明永樂五年。右參政鄭阜義。知州田庸。建祠於墓旁。成化四年。僉事顧儼。築土垣以禦樵牧。本朝嘉慶二十一年。知州傅昆易。以碑。又建玉光亭於上。道光四年。知州黃錫寶重修。又撥祭田若干畝。蓋昔人之表章屢矣。王象之輿地紀勝。稱晁氏所記。公元符初。移於化。未幾。以疾不起。聞賓人李寶善。善地理。諭公之子冲。使窆之南山。且預言。當獲歸葬。已而果驗。刻在郡南山二里南山寺。未經寇毀。墓左有碑。乃崇甯五年所立。大書龍學范公墓。揭於墓額。阮文達據之。以為化州乃公窆所。而非墓所。余以為王氏之說。自非無徵。而化州

之墓亦不可廢。何也。先聖名賢之祠墓。所以必加崇奉者。豈徒以其骸骨哉。將以使天下後世。過瞻遺廟。慕仰前徽。油然而生其廉恥之心。而作其為善之氣。亦猶是樹之風聲。作之表儀云爾。故堯陵一在平陽。一在定陶。考古者傳疑不廢。即粵東而論。張世傑墓一在陽江。一在新會。君子亦以並存為是。昔人云。與其過而廢之。毋甯過而存之。殆以此歟。如僅以骸骨而已。久已淒為冷風。盪為煙雲。何從保護而愛惜之哉。余恐後人之泥於阮氏之說。故檄化州吳君重加封樹。清其祭田。並為文一通。使勒之石。俾後之來者有考云。

徐莊愍公別傳

公徐氏諱有壬。字鈞卿。一字君青。烏程人。寄籍宛平。道光八年舉人。明年成進士。試戶部主事。授四川司。洊升山西司員外。陝西司郎中。以精核為上官所重。京察一等。入對。宣廟夙知公精算術。垂詢良久。奏對稱旨。二十三年。擢分巡四川成綿龍茂道。明年署四川按察使。時囑匪滋事。公馳至近賊地方。用紳耆為耳目。懸賞購賊。不數日。渠魁就擒。擢廣東鹽運司。明年兼權按察使。清遠縣土匪戕官。坐死者七百。人。公廉知有冤。反覆研詰。釋無辜百餘人。二十九年。擢四川按察使。文廟登極。詔求直言。自道光以來。司道恐為督撫所忌。不敢復有陳奏。公密封奏事。言人所不敢

言。遷雲南布政使。滇省運銅經費自軍興以來。他省不能津貼。京銅遂不能起運。廠丁坐困。將謀不軌。公請就廠鑄錢以甦民困。上下便之。咸豐三年。調湖南布政使。時長沙新被兵。公私交困。公撫綏擘畫。處之裕如。旋丁內艱。歸。六年。賊陷甯國府城。湖州戒嚴。浙江巡撫何桂清奏起公督辦湖郡國防。屢辭不獲。乃修濬城濠。募勇敢守要衝。誅土豪數人。賊知有備。不敢近。七年。服闋。奉命督辦江南軍營糧臺。旋擢江蘇巡撫。時何某總督兩江。與江蘇布政使比。公遇事持正。吏治稍清。鎮江鈔關例由巡撫委巡道監收。月俸白金千。大府生日及歲時。伏臘州縣各有餽遺。相習百餘年。公皆卻之。漕米淨收之弊。甚至正米一石。加耗至四五石。民不聊生。公奏明通飭州縣照例徵收。力除苛索。十年三月。和春圍攻金陵之師潰。退保丹陽。輜重盡失。公飛運軍資器械以濟之。既而丹陽亦潰。何桂清棄常州遁。賊長驅犯蘇州。公激厲軍民嬰城固守。移檄責詰桂清。並勅其聞警倡逃。誤國殃民狀。未幾。常州亦陷。賊眾大至。族弟某詢以進止。叱曰。存亡視城。何問為。復請以家屬出。亦不許。城破。衣冠坐堂上。遂被害。子震翼亦死之。事聞。照例賜卹。予謚莊愍。公耿介端方。言笑不苟。少就業於鄉。先生姚學埭之門。務為有用之學。尤精算法。雖西人亦歎為不及。授成縣道。時入對。宣廟詢以圓明園水高於京城幾十丈。又出西洋進貢奇器。令指陳用法。

公一一奏明。面諭褒美。著有務民義齋。算學行於世。

趙忠節公別傳

趙忠節公名景賢。字竹生。湖州歸安縣人。父炳言。道光六年進士。官至刑部侍郎。公少英爽。工文辭。以風流自命。有機謀。臨事輒能斷。道光甲辰舉於鄉。以父子異籍。被議。褫巾服。入貲得復。選授宣平縣學教諭。未赴。改捐內閣中書。咸豐三年。賊陷江甯。王壯愍時以定海同知。權知湖州府事。勸富紳捐輸助餉。公捐銀三千兩。助壯愍派捐甚力。浙撫何桂清奏以公為甘肅候補知府。加道銜。時吾鄉士大夫好矜細行。貌為道學。君生長膏粱。多嗜欲。日飲酒。近婦人。尤好持人短長。與長吏相枝持。故公雖自負。鄉人未之奇也。徐莊愍公獨器之。謂曰。君有應變才。將為國柱石。宜保崇令德。君亦見世多故。處心積慮。思得一當。庚申。賊踰甯國。陷廣德。趨湖州。公時遊蘇州。聞警馳至。與湖州府知府瑞春公。湖州協副將鄂爾霍巴公。歸安縣知縣廖君宗元。烏程縣知縣李君澍。都司趙君鼎元等。籌守禦。當是時。士皆虛伍。官無一錢。一日之間。警報疊至。傍徨相顧。莫知所出。公曰。事急矣。今市肆雖空。其所有。未能盡徙也。權宜發之。以充軍實。事成猶可以謝父老。否則亦免為盜資耳。於是下令有不聽取者。治以軍法。不半日而事粗集。公曰。未也。今城外民居如櫛。賊至窟其中。城不能守也。於

是悉焚之。適總兵李定泰自安吉敗歸。君引以共守。次日賊至。公部署既定。內短刀
鞞中。登城誓必死。賊知有備。解而南。陷杭州。新撫王壯愍上公守城狀。得旨以道員
用。賞孔雀翎。額爾德木巴圖魯勇號。公益繕城隍。修器械。築牛馬糞。樹梅花椿。防賊
再至。越二月而賊果至。號十萬。沿城大掠。火光燭天。喊聲聞數十里。公閉城堅守。意
氣自如。會湖北援師自石埭轉戰入。賊遁。奏上得旨。以道員記名簡用。旋授福建督
糧道。初胡文忠檄道員蕭翰慶由楚援浙。入賊境五百里而始達。將至湖州。馬蹶被
害。衆無所屬。公撫而有之。兵勢頗盛。有輕賊心。思收復蘇州。成不世功。攻平望。克之。
入其壘。軍實。賊反乘之。遂潰。公歸。益募兵思雪恥。而賊圍復合。副將劉某者。故輿臺
也。自平湖潰歸。通款於賊。偽為援者。謀入城內應。公偵得實。陽治具款之幕中。而止
其兵城外。陰簡精卒千人出。令人束竹箬於腰。為識圍而殲之。磔劉某於市。賊聞為
之奪氣。圍兩月不能克。遂解圍去。明年杭城既陷。湖郡勢益孤。公知事不可為。盡遣
其家屬。而身居守。賊遣降將二人持檄招降。斬以徇。是時浙江列城皆潰。惟湖州城
堅守不下。乃大舉來攻。賊屢以地道陷名城。湖城低窪。掘地三尺。即見水。賊乃無所
施。又四面大湖環之。雲梯衝車皆無用。惟築壘樹柵。層層進逼。為坐困計。時城內外
水陸兵勇八千有奇。男婦十一萬有奇。糧且盡。所部素無紀律。沿門搜索。禁之不止。

會有密旨。飭赴福建新任。公思遵旨。潰圍出。登高瞭望。數十里外。賊兵如蟻。鳥飛不過。遂歸私宅。縱酒求死。同治元年五月三日。諸將有通賊者。城陷。公被執。佯狂賊中。久之。而後被害。初。湖城之陷也。有旨。詢公下落。大吏以傳聞不一。怨謗方興。難其奏。及是。公之叔江蘇候補知府炳麟。始述為事略。上之大府以聞。奉旨。照巡撫例。從優賜卹。於地方建立專祠。尋賜祭葬。予謚忠節。

二忠傳

湖州府知府瑞公者。諱瑞春。字慰農。姓鄂濟氏。蒙古正藍旗人。由筆帖式。升禮藩院郎中。軍機章京。權湖州府知府。歷權金華。温州府事。治湖數年。慈祥愷悌。政尚寬平。民甚安之。有瑞佛之稱。咸豐十年。賊由甯國。陷長興。湖城危甚。公與副將鄂爾霍巴。郡紳趙景賢。激勵軍民。嬰城固守。賊回趨杭州。城賴以延。大吏上公守城狀。奉旨。以道員用。時趙忠節主湖郡鄉兵。多專擅。公無所忤。嘗曰。趙公睢陽之儔。我其為許遠乎。聞者大服。同治元年五月。城陷。公望西門火起。歎曰。鄂公死矣。朝服升堂。賊至。脅之降。公大罵不屈。遂遇害。母章佳氏。妻宗室氏。妾方氏。子候補縣丞富俊。子婦富蔡氏。幼子富麟。皆死於難。江蘇巡撫李公以聞。奉旨。照道員例。賜卹於死事地方。建立專祠。

鄂公諱鄂爾霍巴。字斐堂。姓□□□氏。滿州正白旗人。起家侍衛。出為湖州協副將。湖州初次解圍。趙忠節上公守城功。公以屬邑失守。上書自劾。時論偉之。時浙中徧地賊氛。餉精久匱。湖州捐輸釐稅。皆主於趙忠節。公困甚。日以衣物質錢以自給。忠節有所餽。卻不受。每圍急。身出巡城。而閉妻子後堂。外環火藥。戒家人曰。有不測。即舉火。無污賊。如是者屢矣。及城陷。公在北門督戰。策馬回署。則賊已入廳事矣。公手燃火繩。藥發。闔門轟焉。賊亦斃十餘人。巡撫左公以聞。得旨。照總兵例賜卹。於死事地方建立專祠。

論曰。二公居官能盡其職。其困守孤城也。推賢讓能。鞠躬盡瘁。無爭心。城陷之日。闔門盡節。視死如歸。絕不為脫妻子計。視彼巧全家屬。身辱賊廷者。相去不亦遠乎。余嘗謂如二公者。乃不愧真忠臣。聖人復起。當有取於余言。惜無子弟族人。為之文飾鋪張。遂使天下知有趙忠節而不知有二公也。悲夫。

署紹興府知府廖君別傳

廖宗元。字梓臣。湖南甯鄉縣人也。道光間進士。以知縣需次浙江。屢宰巨邑。有能聲。權宰歸安之明年。賊自廣德趨長興。民心洶洶。吏不知所為。君曰。賊易與耳。湖城據形勝。可戰可守。一坐而待斃乎。會趙觀察景賢自蘇州馳至。遂定議固守。君有機謀。

家居時。練習兵事。故布置井井。賊至屢却。城賴以全。四月。賊再至。圍城三面。君夜率精卒百人。亂流而渡。直搗賊營。賊自夢中驚起。保體四竄。生擒四十六。斬級百。是役也。賊連營數十里。衆號十萬。以昏夜不辨吾兵多少。驚擾達旦。自是不敢近城。遂解圍去。當是時。巡撫王公多歸功於趙觀察景賢。而湖城百姓則惟君是頌。於是。有為蜚語上聞者。君解任。聽勸。學使張少司寇力白之。巡撫亦微察其枉。會浙東事急。以君能任勞怨。檄權紹興府事。君至。一欲以治湖者治紹。而事已不可為矣。紹民故不樂城守。奸民又造作謠言。以君為偽。毆君幾殆。越明日。賊至。有開門者。城陷。君死之。時十一年九月廿八日也。明年巡撫左公為之請於朝。賜卹如例。

論曰。君故霸才。作事無瞻顧。然頗能以禮法自持。非恣肆險詐者比也。君有大造於湖。湖之民能言之。攻湖之賊能言之。天下莫或知焉。此旁觀所代為不平者。無惑乎君之不能默然也。余下第回南。病患簡出。君以余固顧桑梓之急。大有違言。及君被構。余為之言於星白侍郎。白其枉。君大愧服。嗚呼。使得如君者十餘人。寄以牧守之任。浙事何遽至此乎。

凌少茗先生別傳

凌先生名介禧。烏程縣學諸生。凌氏世居城東之晟舍。自明以後。代有聞人。忠介公

殉甲申之難。凌氏之望益著。先生少敦行誼。謹於規矩。尤留心經世之務。慕忠介公之為人。以忠介號茗柯。故自號少茗。家貧。藉館穀以養。游盧敏肅林文忠諸公間。均相引重。嘗謂東南水旱。存鑄由於水利不修。作東南水利略六卷。於鎮江蘇州松江杭州湖州嘉興太倉七府州水之來源去委。疏濬之方。蓄洩之宜。皆足履目驗。水宿山行。實事求是。不為紙上空言。又憫故鄉田賦之重。推求唐宋田賦舊額。元明重賦之由。列祖加恩減賦之旨。為程安德三縣田賦考二卷。又輯古忠臣義士烈女絕命詩詞。為金管扶教錄十二卷。輯古之嘉言懿行。為敦行續錄七十二卷。以續其先人之書。老而好學。年七十餘。露翼風鈔。終日不倦。同治元年。湖城不守。鬱鬱而卒。陸子曰。先生負有用之志。以諸生終。論者皆惜其不遇。愚謂中興以來。前江蘇巡撫今協辦大學士直隸總督合肥李公。前浙江巡撫今陝甘總督湘陰左公。奏減江浙田賦。今浙江巡撫湘鄉楊公。江蘇巡撫豐順丁公。大興東南水利。皆採用先生之書。然則先生身雖不遇。其言則既行矣。視彼著書滿家。身名俱泯者。所得不已多乎。先生年七十餘。倦游歸里。先資政公聘主家塾。授余及弟性源讀。時余年十五。頗以好讀書。不喜時文。為先生所賞。獨念先生無當世之責。悵悵於民生利病。如不及。余受今上皇帝特達之知。竊位方面。不能為地方興大利。除大害。為有負先生之教云。

節孝許氏傳

節孝許氏。湖州歸安人也。性至孝。幼嫻詩禮。父沒無兄弟。誓不嫁。以養母。母以大義曉之。始嫁為生員胡承基妻。敬於夫。孝於舅姑。和於娣姒。時金陵大營潰散。蘇常相繼不守。浙西岌岌甚。居民一夕數驚。承基挈家南徙。將依其弟於粵東。節孝請於舅姑曰。禮婦人內夫家。兒當侍大人同行。惟兒母老。旁無兄弟。不忍離。念得留以養母。則兒雖死之日。猶生之年。舅姑憐而許之。湖城陷。節孝曰。我不可以污賊手。投河死。陸子曰。昔齊人嬰兒子。以事母不嫁。名聞鄰國。聲施後世。今節孝以為女。則孝為婦。則節視嬰兒子。殆又過之。嗟乎。世之匿父母之喪。而忝為民上。屨衣冠之列。而屈膝賊庭者。可以愧矣。

書張念哉大令遺事

張祖基。字念哉。直隸滄州人。嘉慶辛酉拔貢。道光十九年。知烏程縣。其為人守正不阿。廉明勤敏。以古循吏自期。鹽商某嘗誣良民為私販。縣受例饋。多曲意從之。祖基抵任。某循例餽金。卻之。後執一人赴縣。祖基訊知非私梟。問曰。爾能走乎。曰能。祖基曰。汝試走。吾觀汝能。其人行數十武。止。祖基大聲曰。速走。不得住。其人遂疾走去。諸生某素無行。鄉人有售肥雞者。過其門。偽為欲市。而以瘠雞易之。爭辨未決。祖基過。

鄉人攀輿而號。駐輿詰問。生不承。祖基曰。爾難何食。曰。食粟。問鄉民。民曰。適食豆滓。剖之。如鄉人言。生語塞。輸錢與鄉人而罷。富紳某之家屬。匿賈人布。賈人訟於縣。祖基邀某至署。設次。甚誇某臂上金釧工作之精。託言欲仿製。借之入內。密遣人持釧至某家。言其主以匿布被留。令持釧為證。以取布。其家恒擾。急出布與之。祖基出布示某。而還其釧。某大慚。賈人感泣去。其仁恕明決多類此。人至今猶樂道之。育嬰贖產為某紳所侵蝕。事幾廢。祖基別延紳士重定章程。又籌錢二千串以充之。全活甚眾。在任四年。案無留牘。人無冤抑。吏不敢為奸。有青天之目。擢石浦同知。旋卒。士民有巷哭者。

書鄭東里遺事

鄭裕國。漢軍口口口人。負經濟才。慕子產之為人。故自號東里。乾隆五十八年。由浦江縣調補歸安。嘉慶元年。卓異引見。調署錢塘縣。民相率籲大府請留。三年。復回任。後遷宿州知州。轉部郎。道光初。擢江甯布政使。終於直隸布政使。裕國資性明敏。廉介自持。洞悉民隱。果於興利除害。發奸摘伏。明察如神。湖郡有匪類百十人。號健人黨。橫行鄉里。民苦之。裕國廉知黨人於三月廿八日集東嶽廟。密率兵卒出不意掩之。黨人方會飲。無一脫者。竄首惡十餘人。餘懲治有差。一鄉帖然。嘉湖兩府採辦

上貢絲斤。吏恣為奸。裕國改歸商辦。不經吏手。各邑效之。民以不擾。學政某性乖戾。立法須通場交卷畢。乃開放。士闕學政怒。將盡褫之。裕國言院中廣若干尺。深若干尺。每人占地若干。地窄人多。又暴烈日中。咎不在諸生。學政不能奪。歸安縣學。自乾隆二年何錦重修後。日就頽圯。嘉慶三年。裕國倡捐重建。明倫堂尊經閣崇聖祠敬一亭。自為文記之。其他御史之嚴。聽斷之明。撫字之勤。催科之不擾。善政不可枚舉。婦人穉子。皆稱為鄭青天。去之日。百姓鑄錢建坊於東門外。取養民惠使民義之意。題曰惠義。以誌去思。民至今不忘。二百年來。殆罕其匹。論者以為不愧子產云。

記卞小足遺事

庚申四月望之前二日。賊既陷蘇州。徐君青中丞死之。蓋足為吾鄉光矣。未幾復有卞君小足之殉。君名乃繩。光祿斌之子也。少豪縱。不拘小節。以諸生從軍。積勞至知縣。需次江蘇。己未秋。權知婁縣。有政聲。當是時。承平既久。州縣皆不習兵事。倉卒不知所為。君久於軍中。太守某甚倚之。君亦慷慨敢任事。賊至。君督兵出城迎擊。兵潰。被執。大罵不屈。賊支解之。嗚呼。自咸豐戊午以來。官於吳者。以湖人為最多。洎乎大營潰散。列郡土崩。其時抱節以死者。大吏惟君青中丞。而州縣則惟君二公。皆湖產也。嗚呼。感矣。

徐侯齋先生像贊

侯齋先生與巢端明沈壽民稱吳中三高士而先生名尤著傳之者不下十餘家詳矣。余讀先生居易堂集其文皆主於扶世教植綱常而悲憤鬱結之思戚然流露於言表。蓋歎先生固非一邱一壑者流於戲使先生于明運可挽之時必有可以上致其君下澤其民者。乃南都既覆閩粵旋亡滄海揚塵新朝改物先生遂以有用之才布衣薜屨章皇草澤抱節以終亦可悲矣。而論者齊之巢許之徒豈其然哉。豈其然哉。吾友凌子子與高士也慕先生之為人而學行實似之。慕先生之像懸之座右以寄高山景行之思。而命贊於余。余謏陋何足以贊先生。然不以先生為古隱者流。先生應亦許我焉。贊曰。

宋纖之節。王良之心。獨潔其身。乃全大倫。幅巾依然。布衣如故。先生之風。日月終古。

記化州橘

化州橘以治痰名天下。相傳仙人羅辨種橘於石龍之腹。即今州署之蘇澤堂也。故以產蘇澤堂者為上。州署前後次之。賴家園又次之。聞化州譙樓鼓聲者又次之。其實大於柚。皮厚肉酸不可食。名雖橘實非橘也。蓋其地有山產礬石。州署適當山麓。蘇澤堂尤礬石所萃。橘生其上。故能治痰。而治寒痰尤神。然則橘之所以能治痰者。

以礫石故去礫石漸遠則其力亦漸微土人謂仙人羅辨所種者殆亦附會其辭歟蘇澤堂今存樹十餘株歲產橘千頭結實時州官先籍其數典守之夜則擊柝以巡熟則分餉上官及同僚高廉道例得真者二十枚若是其可貴也郝志謂每斤直一金至今猶然賴家園環山為園種橘數千株歲產橘數萬頭上園者一金易五枚下園者一金十枚子孫世食其利蘇澤堂橘皮質細捫之微有毛產賴家園者質稍粗毛如蘇澤堂今江浙以毛長者為真不知乃距化州城六十里某墟柚皮非橘皮也蘇澤堂橘惟州官及州幕能得之賴家園橘高州人能得之聞化州譙樓鼓聲者廣東藥肆能得之若外省藥肆所有皆贗耳化州某君良吏也能於其官以事至廣州州守某君徵橘皮於君君以四十枚饋閣者索賄君拒之不得遠某君銜之旋權按察使以前憾撫君細故議於大吏將罷之余力白其枉議不行余之內名也某君感余知以化州橘二百白金二百贖余返幣受橘故余篋中化州蘇澤堂橘獨多余巡高廉廉俸所餘盡斥以周書院之寒士將行士人多以賴家園橘贈故余篋中所有賴家園橘亦獨多

記緬茄

高州府城之西觀山之麓有樹焉翼然如蓋其高臨山繫之成圍蔭蔽數畝土人告

予曰。此緬茄樹也。其花黃。其實如皂莢而橢圓。其色黑。其性寒。其實堅而澤。可以愈
瘳。前明中葉。有李姓宦於滇中。攜種而植於此下。種他所則不生。蓋三百餘年矣。予
惟人情喜新好異。自昔而然。奇植異卉。苟非中國所恆有。雖無益於世。世亦爭寶之。
甚且以充土貢。緬茄為東南所僅見。治日與空青同功。其可貴宜倍於他物。而品不
登於本草。名不著於方書。豈物之顯晦。亦有幸有不幸歟。雖然。新會之橙。化州之橘。
南華之菰。石龍之香。皆粵中上貢之品也。大吏徵之。有司有司。賦之小民。民不享物
之利。而但見其害。然則緬茄之不幸。固吾民之大幸也。

記異

同治十年三月二十二日。天日晴朗。將晡。雷聲殷然。有大風從西來。如萬馬奔馳。如
怒潮洶湧。黑雲壓簷。大雨如注。屋瓦盡飛。約炊許始定。湖州府城之南街蓮花莊。及
城南之郭西灣沈店橋。城東之烏山二里橋等處。民居半毀。壓斃數十人。踣歸安縣
學牌坊二。拔大榆樹一。拔愛山臺下王氏宗祠大銀杏樹一。而城北十里外居民。若
不知也者。聞杭州紹興同日被風尤烈。是日余以祭先資政墓。至城南三十里之逸
村。乘風挂帆而歸。快甚。未至九里山里許。風勢漸猛。忽見四山如墨。亟呼舟人收帆。
風已吹舟入葦中。歟盪者再。須臾至碧浪湖。則見覆舟滿湖矣。蓋風勢自西而東。九

里山在碧浪湖南。不當其衝。故舟得無恙。是日也。屋有對衝。望宇而毀。完殊者。樹有同植。並列而折。全異者。論者以為龍爪所及。則毀。否則全。愚以人事論之。對衝望宇而毀。完殊者。其毀者必舊居也。否則雖新而功必窳。其完者必新居也。否則雖故而功必堅。亦有堅而反毀。窳而幸完者。其堅者必高而無所依。其窳者必低而有所倚者也。樹有同植。並列而折。全異者。其折者必老樹也。其全者必新樹也。樹老則陰茂而根空。陰茂則受風。根空則易折。樹新則枝低而本實。枝低則避風。本實則難搖。理固然也。嗟呼。宇宙不齊之故。古今難測之機。盡此矣。故君子語常而不語怪。任理而不任數。信道而不信神。

亡弟子壽權厝誌銘

亡弟名性源。陸氏。字子壽。復齋其別署也。生而太夫人病乳。餌糕餌以長。七歲入學。如成人。不好嬉戲。年十四。六經三傳。皆能上口。性和易。能得家人歡。故家君及太夫人絕愛憐之。年十六。家君命余授弟書。風晨雨夕。兩燈熒然。殊可樂也。余性不耐作制舉文。弟亦好觀左氏史漢等書。往往與余論古今成敗得失。頗有會心。學作小詩。亦具有丰韻。余性卞急。弟偶有過。面斥不少假。往往不能堪。向隅而泣。家君及太夫人問之。亦未嘗恃愛而有所訴也。而尤篤於孝弟之良。往年避賊山中。余卧病。弟日

誦新唐書數篇。余伏枕聽之。以為娛。未幾家君亦病。余日奔走延醫。弟侍牀席。奉湯藥。衣不解帶者數十日。弟體素孱弱。露齒。面有青痕。相者以為不壽。余頗寬其課。今年余治兵唐樓。及歸。見弟貌頗豐。心竊喜。歸五日而弟病。病三日而卒。嗚呼。吾弟竟止於此耶。余年來頗有四方之志。幸弟出入左右。能得二老歡心。弟亡而余將何以娛二老耶。弟生於道光甲辰十月十四日。卒於咸豐辛酉七月廿七日。年十八歲。權厝於道場山祖塋之旁。銘曰。

玉樹芝蘭。家庭之秀。未實先摧。傷心孔疚。造物忌才。不如不生。既生且奪。夢夢何心。徐幼青誄

君名振翼。字幼青。烏程中丞之子也。納貲為郎。性豪邁。有大志。常慨然於桓宣武。王景略之為人。中丞絕愛憐之。君頗曉就余。聞余談兵法。及古今名將戰守事。往往眉飛色舞。恨不目擊而身親之。當是時。大兵圍金陵久。太帥方鋪張功績。謂收復在旦夕。日趣使邀賞。君聞戰手詆罵。以為自古未有頓兵堅城之下。十年不克者。吾見覆敗之不遠也。余雖驚駭其言。而愈以此奇君。君雖幼。每發一論。以蹈人瑕隙。往往極中肯綮。雖老生宿儒不逮也。城將陷。左右皆勸君出避。君曰。二親皆誓必死。我何忍獨生。父死忠。母死節。子死孝。此吾父素志也。吾甯逃之乎。卒不行。城破。投池死。嗚呼。

烈矣。初中丞精推步之學。公暇兼以課君。君性不耐煩細。頗苦之。時牽余與中丞談。以逃課。回憶曩時。曾幾何日。而君已為完人。卓然可傳於後。余方履蹈危機。救死不暇。每一念君。愈以益愧而增痛也。乃為之誄曰。於子則孝。於臣則忠。古有珍盱。其將毋同。

苛政猛於虎論

嚴辰

嘗讀檀弓而疑孔子所謂苛政猛於虎者。謂賦斂乎。謂徭役乎。註疏家均無明解。竊考泰山之側魯地也。春秋時井田未廢。阡陌未開。什一之法。列國遵行。而魯獨履稅畝。用田賦。什而取二。又加盈焉。安得謂之無苛政。以此推之。所謂苛政。殆徭役也。其時列國兵爭。幾無虛日。獨魯為周公之裔。稱為宗邦。大國每加禮焉。故其被兵獨少。受役亦輕。而他國興師動衆。形民之力。而無醉飽之心。其民輒至肝腦隳白。刃膏血塗原野。此泰山婦人之舅。若夫若子。所以三世葬虎口。而不願去而之他也。雖然。孔子之言所包者廣矣。自秦併天下。復為郡縣。戰爭少息。而廢井田。開阡陌。自是恣意取民。蕩然無復先王之制。故唐柳子厚著捕蛇者說。極言悍吏之催科。至於叫囂。隳突。雞狗不安。而引孔子之言以為信。蓋漢唐而下之苛政。固在賦斂。而不在徭役矣。宋時青苗法行。蘇東坡上哲宗疏。謂如縱百萬虎狼於民間。即用孔子之說而行之。方今天下。西北苦徭役。東南苦賦斂。幸遇聖人在上。輕徭薄賦。屢頒恩詔。所謂猛虎之喻。斷斷無其事。然或有司奉行不善。致為吏胥中飽。而實惠不能及民。則虎威而狐假者。尚恐不免。執政者其三思之。

沈雨梧先生南遊草序

古詩人每侈得江山之助。而著作成書。則必以藏之名山傳之其人自負。若晚近輩流。偶耽吟詠。何能求助於江山。然苟終身跼伏戶內。不復見乾端坤倪。是何景象。則將何所藉以發摭其性靈。吾鄉又地處平行。絕無高大山川。足供吟眺。有志之士。誠非遠遊。不足以昌其詩。至有詩數卷。而即作傳世之想。夫亦何能。余嘗謂我輩有詩。但可藏之家。孰傳之子孫耳。然亦談何容易。子孫賢而有力。則祖父之詩得以傳。而其不肖及無力者。固皆無望其傳也。吾邑沈雨梧先生。世居烏戍。生於乾嘉之間。少習舉子業。七戰棘闈。不遇。年四十矣。好為詩。家居鬱鬱不樂。輒索筆走萬里。訪其故人於滇。其往也。泝之江而上。過吾祖子陵釣臺。入江右。謁文文山祠於廬陵。上十八灘。由南贛入粵。折而至黔。取道湘南。謁賈太傅祠於長沙。遂由湘南舍舟登陸。間關萬餘里。以達於滇。盡覽其洞壑之奇。遊倦而返。則又取道江右。登滕王閣。訪百花洲。謁王文成祠。而泛彭蠡。望廬山。出潯陽江口。順流而東。攬秣陵金焦之勝。乃道常潤。過吳門而歸焉。其游甚壯。而詩遂以多。詩皆摹寫勝境。憑弔古蹟。庶幾能得江山之助者。顧先生沒已數十年。既經兵燹。而稿得無恙。則藏之家。孰傳之子孫之力也。文孫馨齋。膳部精岐黃之術。名噪吳越間。數百里外。士大夫家及巨商大賈。爭挾重幣相迎致。其治疾能得古人法外意。每有他醫所百藥不效者。一藥起之。於此道殆有

神解。然性極好善樂施。每傾其青囊餘蓄。貸親友。賑貧乏。施藥餌。不少吝。今奉先生所著南遊草見示。欲壽諸東梨以傳永久。而丐余弁言其端。余生平足跡半天下。亦有詩十數卷。而童時隨宦至滇。自後數數往來滇黔間。其遊踪所至。多與先生合。故集中所題之境。所詠之景。往往有同者。受而讀之。不禁鴻爪雪泥之感。而又嘉馨齋之為子孫既賢而又有功。能傳先生之詩。以永先生之名。尤願表而出之。以為世間詩人之有子孫者幸。並為為詩人之子孫者勸。是為序。

邱母嚴孺人家傳

蓋聞婦女卓絕之行有三。曰貞曰節曰烈。烈以死殉。其事似難。而激於一時之血氣。不顧其他。則難之中有易焉。惟節則如茶飲藥。至數十年之久。其事似易。而實難。然究為夫婦之情所感。即備嘗艱苦。而心有所甘。惟貞則絕無夫婦之情。而明於大義。斷自寸衷。為尤不可及。故朝廷必分別褒崇。以各旌其所難。乃世又有實為貞而僅以節傳者。則其心較苦。而遇尤獨奇。如吳之邱母嚴孺人。有足傳者。邱氏世居吳興。之長超山。自前明諱箴者。為唐藩紀善。國亡殉難。其子諱文美。百計尋親。負骨歸葬。始遷於吳。後於道光朝請旌。孝子六世孫長蘆。候補鹽知事。諱承業。為長子。魯餘。上舍。諱光燾。聘孺人為婦。孺人本吳中望族。曾祖諱福。為乾隆乙未科會元。翰林院

編修祖諱榮。為乾隆乙卯翰林。仕至浙江杭嘉湖兵備道。父諱良士。為太學生。孺人年十七來歸上舍。適值翁病甚。姑已先歿。上舍素孝。雖新婚不入室。侍翁疾。衣不解帶者半年。而翁竟歿於天津。需次之寓舍。宦橐無所有。魯餘苦塊號呼。竭力營辦。始得扶靈輒附漕艘南下。竟以哀毀得疾。行至德州。卒於舟次。與孺人名為伉儷。實未一親笑語也。孺人以伶仃一少婦。猝遭奇變。間關返里。家乏僮石儲。上無尊章。莫可依託。乃歸侍其父於家。孺人幼嫺姆訓。端莊淑慎。讀書粗通大義。鍼黹之工。固不習。家居前後二十餘年。中遇粵寇之擾。侍其父避居鄉曲。流離顛沛。事父惟謹。與兄嫂間無間言。親串中外。客來者罕見其面。前年父卒。而孺人亦病。幸夫之從弟英甫舅氏名光杰者。奉以歸。甫十日而歿。英甫舅氏以其子同基為嗣。改名丕基。又未及百日而殤。孺人之節。可謂苦矣。孺人之遇。可謂奇矣。英甫舅氏為來述其梗概。乞為之傳。辰不文。何足為孺人重。惟念邱氏為吾母中表戚。誼不容辭。且憶辰於道光甲辰冬日。以公車留京邸。吳引之表舅氏時官水部。一夕折柬招余與花燭筵。至則即上舍借地作洞房。時孺人父亦客京邸。余往來兩家。觀其迎親合卷。時知事公已病。不能乘車。猶記其筭將來京。一觀成禮而去。此事忽忽三十年矣。想當作賀客時。意必祝其夫婦偕老。兒女成行。而不料其夫之數月即歿。其婦之苦節數十年。歿而無嗣。

然人生如白駒過隙彭殤一致同歸於盡耳惟名為不可滅魯餘既以侍疾毀卒足以繼其始祖孝子之風而孺人又以節而兼貞可以上邀 朝廷褒贈之榮其視夫婦偕老兒女成行而與草木同腐者又孰得而孰失哉乃不辭而為之傳

游君山記

高心夔

同治六年夏四月。郭公伯琛以羅叟研生從長沙來岳州。走書要梓湖吳先生。就會陳陵磯館。予者三日。而劉公孟容罷陝撫歸道。此。前為期乎君山。既集。雲景和媚。晨雨。記之。巨湖之中。一日之頃。萬秀呈吐。予資以舟。俾暢游以去。尋得郭公書。以謂昨會游之樂。冠生平。極人天。後有游者。難可繼之。蓋謂予爾。日獨以事不克俱也。自予奉役岳州。且兩年。朝夕對君山。不一鼓檝。諸公至。又缺於從。抑予日怡養其神思於天水杳靄之地。何必君山。獨偃蹇懷此。未輒發耳。六月。役得代。予當東歸湖口。始以立秋日。濟湖訪吳先生於君山。獲登其所謂九江樓者。從樓南極端視山。三面蒼然。一水渟其缺處。不知洞庭之大。而茲山之小也。茲山遂能席其清。負荒結之氣。迎杆南來羣水。橫鄣西湖數十萬頃之驚風怒濤。無賴於形。而損於蘊。則使非是。稽天之洪浸。終古之震撼。度亦才當平野一邱。芻牧所與宅。豎傭所與嬉。何繇蠲滌氛垢。曠世遐邁。與金焦二孤揖讓荆揚間。而况人之孤挺其身。恣磨蕩天地之內。務有所含以成立者哉。是日伏暑。吳先生導予稍稍歷諸亭閣。西北崖谷幽複。桂橘蔽一山。疏風動林。炎氣不亢。相顧樂甚。東軒弄斷木。盈丈。圍可七八尺。無根株鱗皮。不可名年。蟠黝如龍身。而奇理隱雲淵。此山有此物。固已怪絕。而吳先生者。負宏識絕學。以頤

老山中。重使為予茲游之主人。予幸兩遇之。誰謂山靈之貺客。乃偏厚前游諸公者。既謝吳先生歸。明日書而寄之。

漚夢軒記

聖宙其渾渾乎。管乎晦。矧乎明。形骸其粉粉乎。魄乎冰。魂乎營。廣川子浸湛之為學。汭渚之為才。下帷覃思。蜿蜒入懷。臨邛之渴賓先焉。都亭拚除。彭蠡前駟。漆園之泮。隱先焉。胡蝶胥也。化于遽廬。瓊已哉。渾渾何精。粉粉何靈。非靈何選。非精何傳。夫須上公。嘗徵諸島漚已。其賦漚之亂辭曰。江湖浩蕩。惟所遊。漚兮漚兮。又何求。漚既狎。須俄而夢之。須瑞其夢。而以其軒名。荆璞臞疑于東蠡。逸曰。須奚為然。夫警者覺。和者寧。恆也。適者夢勞。勞者夢適。變也。夢為魚者適於淵。夢為鳥者適於天。變而之和也。漚天而淵。謁鳥而魚。羣孰漚之倫。須則夢為漚。歟。漚則夢為須。歟。時其夢也。漚不知其漚。須不知其須。今其寐久之。寤之秋。歟。將行年五十。而知四十九年之非漚。歟。東蠡逸曰。譎夫至道之精。窈窈冥冥。感德之極。泐泐默默。滑和者不和。超適者不適。子庸察夫鷹之挈來。蝶之辯來。樹鷺鷥皇。抵機嬰罔。漚云何來。草玄之家。皓羽吐華。夢美不美。投閣齋。今須汎乎遊。愔乎休。翩乎舉。泊乎浮。纓裳聽杳。與俗違合。頽漚之潔。社荊索邱。餽飡不治。腹漚之飢。幾已其夢固然。且吾廣子。青鷗黃鶴。沼泚

所不拘。彼能壯哉。不知昆侖之崑。蓋有希有方。且左朔湯谷。右朔細柳。鷓鴣之勃。決
疾乎原野。擾擾陸鹵。潰然在下。不知垂雲之翼。天池之徒。水擊三千。扶搖九萬里。去
已將幾何。巨億也。此高卑大小之無極也。故夫舒鳥之翔。不尺。蛟鳩之戢。不寸。其望
夫溷。天池哉。昆侖哉。吾生彭孤。旅雲徒。東放浪乎具區。曠乎溷之與俱。而今值子與
須焉。柱吾與子以須。以溷味。羞蒼苔之實。為須也。糝張吾與子之腋。以溷朝織。璇碧
之英。為須也。因意猶險乎其夢也。須乎。上不珍為番露之龍。下亦不屑元亭之鳳也。荆
璞雕欲有言。而須將客至軒。客雀躍而稱曰。台州之西。弁州之北。維華胥之國。雖羽
民莫能際其域。神遊而已。有熊氏夢造焉。悟然意得。壽三百年。西極之南。隅國維古
莽。寒暑所不鑄。踐鳥所不曜。其民暝以五旬。謂覺所接者。妄夢所為者。真不壽者。乃
八百齡。承是以談。夢者不必夢。不夢者不必不夢。東籟逸曰。夢與不夢。吾之勿能勿
甦也。子闔訊夫溷。

灌園記

吾黨若須上劉公者。隱於書。傅先生治書。兼能為園。先生既貴。其園又貴。其所以為
園者。精精焉。惟灌園之務。其居甚賤。其養甚泊。而德甚勤。其於天下。未遑多營也。有
揚歌於先生之巷者。曰。塵穰穰兮。吳越中一士兮。閭不華。為被屋兮。桂為閭。會蘭漿。

兮陶素書。醉不足兮飢有餘。園中井泉兮鳴泐泐。隧而入兮隧而出。謂壘賢兮彼樸者。諸抱吾壘兮適吾適。吁嗟此士兮天地棘。高伯子履而聽之久。行遠而音流。園篁冷風。適然相振而吟不止。異哉歌者。誰氏之遺氓歟。將與先生遊異方歟。何望先生之深而引吭之酣也。入而請曰。先生聞已乎。曰。聞之。聞之何如。先生伏几而歎。軒顏而轍曰。若未知道。所謂競於古而病於今者也。而歌吾園。所謂競於物而病於心者也。且若烏知之。伯子曰。何如。作而曰。皇哉。天地有人孰能廢。草木有四時孰能一榮落。人軌四時也。有作息。有壯老。孰能亡取舍愛惡。百術番陳。愁吾志者。曠焉。百象榮生。凝吾精者。立焉。彼物者孰善為吾下。徒虞我於若存若亡之間。草木之蟬蛸。四時曠暝之。我因般旋之。為古歟。為今歟。吾作息壯老乎。斯烏辯其賢也。雖然。居不冲夷。其心而外。研研於物。物果虞我歟。池竭自頻。泉竭自中。夫必謹致養矣。物之能養吾心也。亦宏矣。且夫出泉其地。納泉其地。吾無私地。無知也。壘百而樸一。勞逸則遠矣。非奉天施也。園之中吾躬之。園之外吾待之。而又奚競。而又奚病。而又奚營。伯子曰。然則斯園廓乎。先生之六虛。先生灌之。其猶太初之靈府也。道將孰與侔。貴者哉。再誦巷曲之歌。扣澗而和之。先生鶴然審節。撫樹大笑。歌曰。九土之焚焚兮。翳吾目之封也。承往愆之馨。繫兮。厲朝夕之恭也。朝抱壘兮井東。林登日兮曛曛。夕抱壘兮池

南。月在泉兮。激我心。智周道濟兮。不名用。天有斗兮。先生有靈。灌不竭兮。體不煩。欲
諗先生兮。請事斯園。

許氏玉芝園記

翰林編修奉新許君仙屏為園其鄉。有年數矣。予從吳下使書訊之。仙屏報言。味安
仁閒居賦。築室奉歡。思此生不出。悼心失圖。身病且衰。吾黨於今世棄才也。關西黔
南之士。訪吾園廬。請以文字釋憂。有詠充司。無記吾園者。過以見屬。夫文字者。天地
之塞。我之形神也。名業。馮藉者也。倫物。閒止者也。江山風雲。鱗羽卉木。諧隱者也。喜
怒哀樂。憂思彷徨。長我靈善。夷懌者也。而文字滋焉。故凡文字。非可苟焉而已。其形
神有以接乎天地之純。無滯乎馮藉。無礙乎閒止。無滑乎諧隱。而稗乎靈善。則文字
於天地。形神於我。知其夷懌。則已矣。奚外求為。且吾固諗仙屏之未衰也。其為園也。
薰然隆然。鴻然廓然。碣然泊然。園豈無為為之。英英蓋蓋。鬱何糾紛。抗雲。尸。鳴煙。谿。
頽碧輝發。錯乎榱橈。相為偃仰周旋者。不可勝原也。仙屏懷此。以為清甯之德。保我
居息。何天何淵。吾事吾園。諧隱耶。夷懌耶。孰令仙屏汲汲此園者。夫仙屏宜有為於
天下久矣。道光之季。湘鄉嶽立館閣。仙屏蚤植其門。南政賦政。開府禮賓。躡從江表。
浮湛掌記。識李肅毅憤抑之中。推激於殊勛極榮之會。湘淮兩軍。咸同之際。霆擊龍

德頡舉六合。范其霧雨。立化以飛。仙屏耽窺秘書。陸沈金馬。揖讓折衝。有而不與。既而鳴韶登隴。風生河源。疏杞子黎。貞秀苕豎。左恪靖上其材。謨足藩西。顧王人雖微。位先諸侯。烏睹天子文學侍從。援遠臣為輕重。反命萬里。倏然南徂。仙屏於諸鉅公。交非聲華。川谷謚深。亦顯亦晦。然馮藉厚矣。閒止正矣。終一濤發。胸腹瑰奇。若遂結軌躅。還悻闔。玩老氏之幼眇。親淪逸以自恣。毋乃橋亢不情。與處士盜聲者。伍非仙屏所宜然。昔者武岡公子鄧彌之。奮縫掖而冠。兜黎若拒見命。南昌誓師。氣激斗魁者。仙屏禡牙之辭。東湖之盟。掖仙屏執牛耳。各為文字。務絕情采。誦評忼慨。決排憂生之嗟。桀出毀譽之外。是皆壯盛時也。中更離別。文宴清集。危窘欲踣。縣相怨。愬思如南州。讖遊清狂。便難一二。鄧公子窮投都梁山。中。仙屏乃輦吾於肅毅。臆腆一刺之薦。仕吳落落。曾不效其忠智。咨齋茹默。視若無少撓侮於物。擬昔所歷。睽沮孤尚峭棱。芒氣頑沓。鐫剝向盡。雖其文字。亦幾及此。獨吾今日之衰也。仙屏者。自道其憂而不憂天下。託衰自詭。未可以衰言也。然其齒號始衰矣。且當奈何。歲祺二十。南北再別。吾因吳趨。仙屏儼然持節。西攬金筑。北經沙幕。其歸也。聊有一園。燾我所無。固竊怪之。尤怪仙屏將引水木雲鳥。陶其憂思。名業之崇。倫物之備。或漫忽遺。鄙為膚說。故遙記其園。反覆以明其義。馬園以玉芝名者。謂所娛樂。惟庭階耶。信乎吾

仙屏之自詭也

書戴貞女

咸豐十一年。杭州再陷。故人戴鎮沒於賊。後三年。聞戴生死。戴生之志。蓋恥以身免。陰有所圖。忍以求間。飲酒自洩。以死死之狀。蓋由浙西轉之皖南。塞連千餘里。垂與王師相接。不幸事敗。拔自賊中者云爾。今不能詳也。姊金鈿。貞女也。戴生嘗請於予。曰。有姊未婚守志。願先生傳之。於今。貞女節婦未五十。有司不得上請。旌其年。貞女四十有四。應之曰。勉需之。當故報君意。同治六年。予經武昌。遇何縣丞。為貞女夫家兄弟。則聞貞女歿三年已。庸德高志。既自完。以令終。而表彰缺然。立言者之疚。夫貞女。吾郡德化縣人。父監生仁。豪坦著氣。誼教家。不與恆同。貞女幼通孝經禮記。能賦詩。尤愛於父。何氏姑母。欲為其子。崇雅求婚數矣。崇雅亦蚤慧。得舅氏意。許以字之。將請期。崇雅漕運外歿。貞女則易縞素。水漿不入口者數日。戴有時望。媒妁日伺其門。貞女泣以晝夜。父母察其誠然。有問必稱兒疾。耳不聰。幸無言。經歲不釋縞素。求聘者乃止。志士不忘溝壑。勇士不忘喪元。父母之尊。不能奪共妻之志。戴氏獨可謂能訓其女矣。更十五年。崇雅母戴六十。貞女請侍養。行告歸禮。歸何氏。職婦道。老馬數。粥飲水。勤事。紉緝。以奉其姑。篤性靜曠。若遺窮阨。甘貧守素。内外有禮。總所為詩。命

之曰志相。共姜不諒於其母。而戴氏安之。相舟無此也。戴生氣矜。有激烈徑遂之風。與人交不務賢。犯難無慮。不豫死所。一踐然諾。其死近聞。予無從昭之。其死時。孤邁酷烈。無所回屈。固可信其然。若視其妙之從容。不擾蹈義以始終。道孰為茂乎。節行之成以漸。無違於智。而順於理。績美於身。無所病於其天。孤竹柳下。異乎時中之聖。而至德齊禁。古今有以也。且吉凶天壽天也。權不少我籍。禍至常有。大物以捉搦之。其違於禍。抑且撤出之人。一若舞者之赴節。世儒乃適斷為受性之固然。不亦悲乎。要其志。胡可假耶。戴生從子撫州軍中。將千人。能以佩刀斫陣賊。又從子罷歸。勇俠士也。客杭浮沈。卒難於難。予不能備其實。深負戴生書貞女戴生志也。

石鐘山銘

湖口負山為縣。阻臨大江。石鐘山路其北隅。下與城屬。自明季城圯。更二百餘年。莫之繕完。莫知石鐘山之為險者。大軍既克九江。令太子少保兩江總督曾公再起視師。論奏湖口重鎮。宜城以授。今兵部侍郎彭公。而檄知縣事。候補知府岑君蓮。乙縣人。按察使銜記名道屈君蟠。監植因民之材。徵力士之能者。遂經始。咸豐九年己未四月。期而城成。洎庚申十一月。池甯賊馳四百里襲湖口。與祁門援兵爭道。山口市樓櫓處。繕人吏疑沮。內江水師副將丁君義方。勒兵入保。會大風。彭公乘舢板從黃

石磯來省城守時守兵當攻者十一。然賊固已氣沮宵遁矣。一城之蔽。屠江湖於堂
與。捷應彭彭。且彭公之來也。大江昏冥。巨浪撥山岳。船中人大恐。彭公意氣益銳。卒
存此城。難矣。天塹之險。專於水師。開通東道。實始湖口。經營湖口。莫盛於彭公。高心
夔歎之曰。偉夫諸君子之勤也。地勢下江海而秀高陵。竅者善容。翹者善舉。凡有氣
以充之。有督師諸君子以興有是役。湖口之險。以具是故。一城而已。而利在國家。吾
聞丁巳九月八日。彭公帥內江礮船。拔梅家洲。明日水陸大舉。克石鐘山。山洲翼江
而壘。賊殊死阻禦。四年矣。游擊蕭君捷三之功。師屯吳城。彭公代將。崎嶇拊循。併命
以規長江之利。東攻即首湖口。豈不以險哉。今民耕者還其疆。祭者循其壘。歌謳之
聲。與茲山無極矣。彭公宴游之頃。臨乎江城。抑猶拊衿傷懷。吁嘯慷慨。思所以居成
功。勸來者。光輔我。聖清。僉曰。宜為之銘。其在工宣力者。別有書。銘曰。
帝憂南紀。界斧元戎。有醜逋誅。穢我上邦。元戎蒞斯。貴耀。皇武沃焞。以江苑枯。以
雨。嶄嶄維巖。棲阻於天。疇翦夷斯。侍郎桓桓。燔山揜。漸天壁。匪高奪江。飛檣。纂舟於
濤。博慈之存。忠信之繫。孰躬況瘁。而聞不至。川陵委輸。阜成方垣。昔勞而違。今胥而
安。勾濬掖都。舍荆歆吳。魏萬斯仞。攸詹畢圖。旒旒長麾。侍郎其東。河海旁潤。歌舞予
同。皇威既宣。有建無改。作固於民。敬勛良宰。

代理江蘇嘉定知縣劉君墓志銘

嗟乎吏術之難明也。有子養保息者焉。有刑亂鉅疏者焉。始皆賢智者所從事。其利相資也。其勢相倚也。乃其流相非也。相非以心相害以政。則夫法謬本律。獄移成形。一切氣矜折之曰。吾惟知已亂。而後挾私求化者。緣附推激憑肆。猶患不濟。又劫持憲司之鋒威。彈壓同列。多殘民命。調以取容。弱者謹視尺劇。方斤斤不敢乖午。適與彊值前卻。失次心不然之。其口囁囁。偃然無所可為矣。故任夷達則職分輕。貴武毅則陰慝成。唯之與阿。相去幾何。安在其不可相非耶。水波而上。盡搖而下。事會叢變。知常不亡。然而有恥之士。獨膺其禍者。外讐於風指。內迫於憂惻。不能鼓刀助剗。擊何為幃頭弄顏色。蓋將庶幾沈淵尸諫之流焉。嗚呼。其不亦過矣乎。君諱履芬。字彥清。生於雲間。故號泖生。系出江西梓溪劉氏。遠祖廷一。遷浙江為江山縣人。曾祖肇起。祖光表。封贈重疊。父佳。舉鄉魁。選江蘇奉賢知縣。累更劇要。調補溧水。治行廉善。為蔣文恪陶文毅兩制府所禮。尤多隱德。妣周。生母朱。生君及弟觀藻。君承詞宗。發其風頽。匡災之業。不擘而日精。能用著述。縉名吳下。溧水終大年。君亟臨時難。益以貧絜。不務華顯。稍為主事。觀政戶部。咸豐中大寇沒江南。君航海至滬甯家。弟已前卒。將母及諸媪。擇僻地淮浦。積佐暮勞。致花翎同知直隸州。留蘇補用知府。充蘇州

書局提調。久之。光緒五年。江南鄉試。嘉定知縣宜黃程其珏調分校。君奉檄往代。受事三日。民先有逼嫁致死。督部檄一幹下縣決殺者。君已不懌。此幹笑侮之。因迹求民間數事。密聞諸臺。後檄至。此幹張甚。勾捕盡得。君慈恕。不忍文致。親送囚行省。且陳其疑。此幹請必盡殺。乃止。君痛悔失圖。如憚危遽不自勝。反嘉定疾作。滿有日矣。或詐告殺人。需詣驗。君神明已傷。仰天言吾德薄。殃及民。官傳舍客。知冤不能救。不如死也。其日不食。夜分不寢。遲明從者叩肩無聲。翹而入。僵於地。喉骨斷裂。血污被膺。右手短剪。握固未脫。几燭將跋。洗冤錄端展宛然。事上撫部。固始吳公重君所以死也。厚卹之。人皆曰劉溧水子不應爾也。程令至。為舉喪。鉅金贍君家。此幹終不赴弔。君壽止五十三。一子毓盤尚幼。生母年七十一矣。初聘朱繼娶。載無出卒。道室平王。明年當歸葬江山先龍。弟子毓家等具狀乞銘。辱好深無逾心。變者其敢辭。銘曰。國有常憲。爰伏姦慝。用憲棄常。飛姦之逸。譬彼嘉禾。咸疾螟賊。懲害焚畝。宏哉斯感。哀我嘉定。恫蓄自劾。自劾不已。奉身以塞。人知其一。莫慎其餘。魚破網騎。馬備車命。可勦絕義。無苟趨。其心捷市。如此非辜。奇鶴騁霄。殲鳳于竅。江郎臧碧。千年不枯。

進言論

陳爾幹

有兩人焉。各擇一術以處。必其所甚慕者也。既又未嘗不悔。而交相為慕。是非真可悔可慕也。從而易之。悔且慕者。又將如故。故擇術者。非於未事之先。窮其究竟。鮮不為偶爾之利害所移。古來忠蓋之士。殫精竭慮。披心瀝誠。以獻其所見。一二淺識者。往往指其小害。以撓之。幸而人主從我。未幾小害者見。則撓之者喋喋矜得意。而人主之意亦卒移。夫人雖甚不肖。必不願國家之榮懷者。非情也。吾雖甚暗。乎彼必捐吾祖宗之業。子孫之計。以從之。愚者不為也。乃專於任賢者。自古不概見。而苟且旦夕。卒至亡國敗家者。相隨屬。蓋天下事莫不有利害。未事之先。各見其所見。既入其中。又震驚其見在故也。夫藥之足以生死者。即足以死生者也。無甚害。亦多無濟。緩急而待。生於藥者。驟服之。亦未必不見小害。夫藥之入口。死生決焉。亦孰肯冒也哉。有醫焉。嘗屢已其疴痰之疾。則危急之際。亦委之矣。為醫者於用藥之先。又為言。初當瞑眩者。若彼。繼乃收效者。如此。則方果見小害。將轉幸再生之有機。一二淺識者。亦將服其言之不爽。而未敢有邪說。故人臣之將進大計也。有以取人君之信於先。又能杜小人之口於後。則幾矣。夫人方甘以無濟緩急之藥。養其錮疾。而醫之初奏其技者。并不肯任瞑眩之咎。則撓阻者奚待多言哉。若夫不知病之所在。姑以快吾

意之一試。則誠不如無濟。緩急者。猶不速其死。且使後世之人。駭峻品之必不可投。委錮疾為必不可瘳也。悲夫。

裕財策

楊象濟

今天下困乏極矣。民日貧。俗日侈。此不測之憂也。觀其故。亦有由民之自耗者。我嘗思目前救急之策。得十事焉。一禁釀酒。桐城方苞嘗以文酒在書酒誥之文曰。羣飲予其殺。非獨慮其浮費。亦早止其淫佚。自周以至唐宋。酒政皆秉於官。國用即賴以出。無慮教人以釀矣。陽湖洪亮吉所著壽生篇曰。我少時。米一升當錢六七。二十年間。加至二十。今則雖遇歲稔。猶以三十錢為準。使禁其釀酒。則米必加多。且可以禁其淫佚。禁之之法。使每處酒政各隸於布政司。所歲釀限以數。每年賜大脯三日。略仿漢時遺意。其官亦不得無事飲酒。亦庶幾米稍裕乎。二嚴禁煙。無為之物。莫過於煙鴉片。無論已。一日之內。所費不可勝計。明季嘗禁之矣。一日絕之。豈有大苦。往時有議改煙地為稻田。以三年內租稅無出而止。烟性惡毒。凡烟地改種者。新苗必死。須三年後。土性乃復。亦可以知其為惡物而能害人者。若今新墾之田。俟種熟後起科。豈有難行者乎。三辨服色。今之衣飾。上下無別。雖士大夫家。亦不恥為優倡之豔麗。童奴僕吏。與士人無異。百姓之貧。職此之故。數年來。新奇詭異之飾。皆父老所未聞。豈五行志所謂服妖者歟。後漢時。女子為啼眉。墮馬之妝。卒至董卓之亂。援古證今。可為深痛。四裁優倡。今鞞鼓之下。優俳不禁。冶容狐媚。所在皆然。人道不立。人禽不分。陰威為災。故近年大水凶荒之事。無歲不有。此

風教之關也。五去塑像。古者國無淫祀。廟皆奉主。後世設人形。猶惑百變。藉以懾惑愚民。勒索貨財。一廟之中。其衣冠器用。大者動萬千金。小亦數百金。明太祖時。嘗有詔去各處城隍塑像。事不奉行。日甚一日。至妖邪厲鬼。無不窮極土木。以為供養。淫祀無福。此王政所宜絕。六減廟社。古者祭不欲繁。今廟社連城跨陌。所占皆民居。王土。今除祀典之外。一切改為民居。則事鬼之風。可以稍衰。蓋以有用之土地。奉無知之木偶。知者所不為也。七糾賭博。賭博之禁。本在律令。今上自公卿。下至輿臺奴僕。優倡之賤。莫不好賭。惟無賴聚賭者。官或拘治。而官之賭者。百不懲一。身之不正。何以治人。古人有云。行法自貴。近始此類是也。八革齋醮。禍福之來。非禱禳所能免。宜定例。士大夫不得營建施捨。無故興作佛事。所在寺僧。不得聚眾開戒。宋時戒牒皆官主之。而賦其違者。以誘騙論。則可以息靡費。而靖人心矣。九定昏喪之制。近世人心好奢。江浙為尤甚。昏嫁男女。至有破家棄產而不知者。送死亦然。張燈設綵。合樂醮酒。不如是以為薄於其親。故為子孫者。有累數世喪而不能葬者。世道之壞。風俗之壞。鮮不由此。十省金銀之費。婦人首飾。本有定制。一切不行。金之費。有用於漆。及裹飾銀器。紙絹灑金。一經銷燬。永不復還。近日當事。亦曾議及。事竟延緩。若銀自出洋者多。中國愈乏。三十年前。銀每兩錢千三四百而已。以余目擊。六七年間。驟貴至二千。今若嚴

禁眾商。凡交易以貨相克。不得輒用銀錢。亦可以并息內奸之句結矣。凡此事若瑣屑。而不難施行。積之數年。天下必受其利。

汰僧道議

有明知其耗國無益於事。而無可裁。亦莫之敢議者。各省之旗丁是也。口糧給有明知其耗國無益於事。而可以裁。亦無有議及者。天下之僧道是也。旗丁之留。以為守衛。而至今無勝兵。僧道之度。不過祝祈。而至今為國蠹。且以一隅論之。王江涇當一縣二十之一。為僧道女尼者。多踰百人。是一縣之中。應有二千人。合之一府。當幾有二萬人。以天下十三省推之。幾有三百餘萬人。此三百餘萬人者。不耕而食。不織而衣。廢時曠食。待養於民。宮室衣食器用之侈。亞之王侯。俗安得不薄。民安得不貧。是以男女怨曠。上千天和。傷風敗俗。盜賊水火兵革之禍。恆以此也。故今日之弊。不在乎佛老之教行。而在乎僧道之人眾。人道之弱久矣。欲如古人所謂人其人。火其書。廬其居者。勢必不能。今若立法。使僧道官給之牒。每縣無得過百人。其女子無許舍身為尼。貴州廣東福建則絕無矣。故禁之易。收其田產。既汰其人。則不必募有願耕者。畀之。收其稅。如官田。不可如宋時官其婦女之屬。以及士大夫家。無許入寺進香。

存一處為祝釐之所。其在城外鄉僻者。不復修治。嘉禮不野。合事上當。準於禮。是為得體。少則易以為生。如吾所言。於三百餘萬

中。僅存十數萬。散布天下。分食於民。不覺其絀。是每歲得省天下無用之費。不可勝計。而又可使人心風俗。不為邪說異教所耗。儆行之數年。後生小子。非聖人之書不讀。衰才詭術之輩。既知無利可營。則必力為本業。而不復遁於彼法。則不必嚴法禁絕。如昔時淘汰沙門者。其道亦幾於熄矣。或曰。僧道之途。以養夫貧無歸者。夫既歲省數百萬費。復使二百餘萬游手好閒之人。以耕以作。其所生之財。當又稱是我見古來以民情而貧。未聞以民多而貧也。且無知之輩。惕於禍福之說。涓涓不塞。遂為江湖。此亦世道之憂。治亂之關也。他若游方行脚。持片牒出入。歷千里無阻滯。脫有不詭。何以制之。今汰其十八。則人數少而往來亦寡。其亦防奸之一道乎。

范文正公王荊公合論上

陳宗起

有宋仁宗用范文正公經略西邊。參知政事。雖不盡其用。而中國戎夷已莫不愛戴。若父母。迨神廟用王荊公。信任最堅。禍敗亦並著。至今歎之。夫二公皆本經術治天下。然而勛名若是相反。則何也。陳子曰。王道之要。本乎人情。夫人情者。聖賢不能外。愚賤不可欺。天下之公道也。文正公知其若此。因而曲體之。是以功名俱盛。荊公不審乎此。好行其私。故效亦相反。顧此猶二公之見諸設施者。抑亦有其本焉。文正公之言曰。必也。先天下之憂而憂。後天下之樂而樂。荊公之言曰。天變不足畏。祖宗不足法。人言不足恤。凡人憂則思。思則知慮周密。而所圖不失。無所畏。則驕驕則知慮疎闊。而所計不密。且夫知過能改。旋作旋罷者。憂患之效也。務自求勝。而不知悔者。無所忌憚之故也。夫既所慮不失。而又行止無成心。此所以能曲體人情也。務自求勝。而所慮又不密。此所以不近人情也。是以君子之心。常存敬畏。則於人情雖有不合。其亦鮮矣。

范文正公王荊公合論下

東萊呂氏治體論曰。自范文正公天章閣一疏。不盡行。所以激而為熙甯之急政。又云。文正之志。不盡行於慶厯。安石之學。乃盡用於熙豐。神宗銳然有為之志。不遇范

國朝文匯卷三十

二十九

國學扶輪社印

仲淹而遇王安石。世道升降之會。治體得失之機。於是乎決矣。東萊此議。蓋有感於荆公之遭遇。故深為文正公惜之。予亦有監於文正之遭遇。而深為安石惜者。夫以文正公性情之醇。學術之正。與安石性情之拗。學術之謬。其相去固不啻倍蓰。顧安石嘗知鄞縣矣。為之興陂塘之利。立貸穀之法。即後日之水利青苗二法也。於此行之。民頗受其益。先後之間。利害相反。則何也。蓋以縣令者。親民之官。日覩民之利害。非若居中書時。與百姓相隔絕。惟據一二小人之言。以決行止。此其所以異也。假使安石釋褐以後。亦如文正公遭宰相之怨。有朋黨之謗。出知外郡。更歷十餘所。回翔二十年。周知四方閭閻窮困。與夫水旱盜賊。差科賦役之苦。以及軍興之愁怨。催科之擾害。而又親歷侍從臺諫。熟覩夫奸佞小人。蒙蔽君相。外而監司守令。承望風旨。阻遏民情。凡此情偽。周知徧識。一旦入政事堂。雖或性情學術。不盡醇正。亦何至不近人情。若彼之甚哉。朱文公嘗言蘇氏早年。亦好言兵事。興財利。及後見安石為之不濟。乃不敢復言。然則蘇氏之不早見用。蘇氏之幸也。安石之早受知於神宗。安石之不幸也。吾所為安石惜者此也。若范文正公。雖不必敷歷中外。其必能曲體人情。吾即於其性情學術。有以信之矣。蓋性情學術。其本也。閱歷人事。其末也。本之不立。而徒恃其末。特以古今人固有得力於末者。故為安石惜之。

重刻大學日程序

徐燾

大學日程序。明太倉陳先生諱瑚。字言夏。號確菴。之所著也。夫進於小學而曰大學。古之人特本其性之自然。循乎理之當然。而當然之理。固無一不具於性分之內。天下貌言視聽之官。率以肅又哲謀之則。而其則實天之因物而賦。君臣父子之倫。立以仁敬孝慈之道。而其道盡人之反己而求。帝王之事業。聖賢之學問。不外體之於身心性命。以措之於家國天下。天下無二性。即無二道也。然而人各有修齊治平之責。不能各殫乎格致誠正之功。聖與愚之分途。賢不肖之異趨者。豈不曰得失存乎所學。而入門之始。不可不急講乎。先生為是初讀之。布帛菽粟。若非有微辭與旨之可繹者。然切而按之。即日用飲食之常。寓耳提面命之旨。令人滋衾影之慚。深毛骨之悚。奮然有以興起其好善惡惡之心。先生自序云。大學者。初學入德之門。而此日程者。又入大學之門。不信然歟。其有裨於後學。豈淺鮮哉。是書寒山汪氏集錄於先。正遺規諸城李方赤先生。以授子厚。少尉子厚。嘗置案頭。以奉圭臬。因付剞劂。氏冀廣其傳。噫。先生經濟博通於河渠漕運農田水利兵法陣圖。無不研覈。王鳳喈光祿曾為之傳。錢於耕養齋文集。頗能詳其本末。惜生當明季。挾策陳書。不能見用於當事。其著述甚多。今皆不傳。此吉光片羽也。先生之澡身浴德。卓然已造乎正大光明。

之域猶恍惚見之於簡牘中。而子厚之日于是編。非惟服膺之。又重梓之。其志節自勵。克勤於入德之門。吾知其必有獲也。時道光二十七年丁未冬至之前三日。序於嶺南臬署之東軒。

復吳荷屋中丞書

端州得手諭。聞遂初春晚館。啟筠清魚鳥圖書。怡然自樂。幸甚慰甚。憶昔閣下開府南楚。講藝質經。務崇樸學。儒林發藻。風氣聿新。蒸蒸然析鄭賈之義。殫精博之功。竊謂長沙之域。洞庭滙其清。祝融峙其秀。人文薈蔚。固山川清淑之所鍾。而其得力於騷人僊客之棲遲。賢士大夫之樂育。優柔而饜飫之。濯磨而愧勵之。樊成羽翼。其所由來者漸焉。雖騷為風雅之宗。香草美人。楚之詞賦所由昉也。厥後賈誼傳長沙。投書弔屈。下逮李唐。如子美之轉徙湘上。昌黎之流寓郴州。地以人傳。代有賢哲。學者藉為師資。而文章益盛。理學之闢。始自濂溪。既而朱子帥潭。南軒講學。兩賢相遇。千載一時。而嶽麓三千之徒。擬於鄒魯。迄今朱張名渡。涉湘水者。猶留連慨歎。稱頌不衰。蓋其澤之入人深也。且夫孤臣之放逐。名賢之暫臨。事經屢朝。年逾百世。而流風餘韻。照耀山河。請其書者。思其人。思其人者。愛其樹。時代雖異。嚮往彌殷。况巍巍中丞。久蒞茲土。以經天緯地之才。宏稽古右文之化。勤勤懇懇。耳提面命。不啻父戒其

子師勉其弟甄陶鼓鑄雷勵風行。然則公之所望於楚士也。固無窮。而楚人之懷念於公也。其能已乎。湘中諸生有謀拓校經堂舊址。留公像其中。增墉啟宇。以奉生祠。千載下當如過襄陽者流涕於峴山。至河中者瞻仰於層觀焉。夫以吾楚文章之盛。自屈賈而開理學之興。自朱張而粹經術之闡。實自夫子而愈明。然則斯堂之作。將使拜公之像者。思有以澡身浴德。孜孜汲汲。而知六經之在天地。與日月并行。固不可須臾離也。則此堂也。公不可以不記。長沙聽松上人精於刻石。如蒙賜巨製。當即鐫之堂右。庶幾寶墨流馨。與嶽麓名山并壽矣。不勝引企待命之至。

送介休師還都供職序

楊球光

古之君子。修之於身。見之於行事。發之為言語文章。一而已矣。後世綴文之士。惟欲以此自見。然亦必力敦其從出之原。需之至久。以俟其中之自得。而毋炫於俗。毋急於其名。得與失若不與己事。幸而得之。已無喜焉。不幸而失之。亦未足為病也。自科舉之學興。羣一世皆趨於苟且。以倖一日之遇。而為有司者。又拘程度以求之。其中倖獲者。十嘗五六焉。乃不復審量其愚。以為是嘗勝於人。而取於人矣。及他日在勢。則又操是以為衡。而詭以求遇者。往往強求合其尺度。且務為新特以勝之。以為是非不足以爭時也。其流失所趨。蓋幾於不可復反。然其能者。若有明歸熙甫暨國朝方望溪諸公。皆能精研經傳之義。以扶發古聖賢人之旨。即其制舉之文。亦皆道之所存。與其學之所寄。至今猶盛推之。則謂科舉之業。為不足語於古者。其然與否。與然昔人謂文風隨運會為轉移。率數十年一變。今天子傷文之敝。惕然有生心。害政之憂。用黔西黎大令言。將仍復經義之舊。殆變而之盛之時也。而我介休師視學吾楚。亦早釐正文體。其裝績故事。與凋繪語句。為工者。皆擯不之取。若力崇大雅。不為世俗之文者。則見錄焉。雖以球光之無似。亦辱拔取。而獎藉之一時。湘人士皆勃勃然。爭相濯磨。以復於古。會天子促公還朝。將大任公。眾聞其行。無不相

聚大息而無計以留之。無已則願與二三子共勉焉。卒守公之教。毋少貶以徇夫時。是公之終淑我二三子者。無所間於去留也。既以語諸子。並書之以贈公之行。